



李繼本文集

上



一山文集序

六經載道之文也諸子明道之文也載道之文如日麗乎天明道之文如水行乎地而出無窮其有功於國家有功於吾道豈小補哉抑世之工於文章者固多能明夫道者蓋鮮矣漢上李先生繼本前翰林學士承旨李彥聞之子也稟中州清淑之氣奇才卓犖絕人蚤以能詩名動搢紳登至正丁酉科進士第未幾中原俶擾先生遂隱居不仕上考唐虞三代及兩漢之文下溯伊洛諸儒之源流於勢利澹如若將終身焉而河朔學者尊仰德業擔囊負笈不遠數百里來學先生性雖高邁能隨其才識上下而胥教誨之故登高科躋膺仕屢有其



人是皆教育有素啟迪有方故也敏嘗從之遊且相知之深每嘆其文本根以六經出入乎羣書上下乎諸子之間故其文章渾厚雄深而人莫易窺其涯涘譬之春江波濤一碧千里夏雲竒峰疊見層出又若新秋雨霽玉宇無塵爽氣襲袂冬則如高山晴雪遠樹寒煙其文之變化靡常大率類此其千變萬化固無常矣究其所以無非著明是理也其所以助國家禪治道也不既多乎今年春先生之子方曙方昫訪余於金臺客邸酒邊詢及先生之文皆覽涕而言曰先人平日撰述最多今之所存者迺兵燹散落之餘僅二百餘篇耳幸有以序之敏於先生之文固不敢妄議姑述其梗槩如此云門

人李敏拜手謹書

一山文集序

一山文集卷之一

元進士翰林檢討東安李繼本撰



賦

喜雨賦

辛亥夏余寓繁峙月不雨五月二十有二日大雨
作喜雨賦

五臺之北五原之陽太行削雲間之老翠滹水落天上
之銀潢澮畝縱橫池館清涼鷄犬靜其無譁花竹秀予
有香臥雲子游而樂之遂解裘林下而卜隣於暖泉之
傍鄉大夫喜其來而懼其往也相與劇荒榛締草堂開
蔬圃拭藥囊有琴在御有書滿床奚奴舂柳陰之白粲

隣父過墻頭之綠觴步明月而歌窈窕臨逝波而詠滄
浪跡絕於城市心息乎紛攘蓋將奉親以自樂而高臥
乎白雲之鄉孰期涉茲盛夏天閔膏雨憂心殷殷莫知
所處赤日如焚旱氣旁午牛喘欲頽龍臥不起粟苗半
焦麥實成秕穹林偃子槁木破金啼子渴鼠地靈縮萬
井之源海若收百川之水罷千門之管絃嘆五方之商
旅乃有戴白之翁垂髻之子斲寒潭之清冷羅金擎之
香幣走龍祠以祈靈薦牲俎以陳禮旌幢絢子九霄笙
鼓旬子百里娛以優伶雜以士女既醉既飽載笑載喜
眇天澤之少施異神心之暫啓俄而玄霾塞乎沈寥容
霧沉乎階阼恍疑起潛蛟於巖幽而捲怒龍於江渚也

少焉明霞收流雷止日迎霧以霽澄風吹雲而披靡氣
將交而復離惠將布而復弛兆姓吞聲而無驩萬口戕
天而矢死魏巍皇穹憫民之窮沛然下雨當茲五月之
將終方是雨之欲降也炎光墮地層陰蔽空萬蟻封穴
百鳥號風日車騰騰以邁邁雷熾閃閃以交攻山川晦
藹乾坤晦蒙雷震天門之鼓水涌馮夷之宮及是雨之
既作也噴灑空際飛流海東浪奔平皋之雲河走長橋
之虹瀉天瓢於八極散銀竹於千峰回生意於萬象蘇
渴望於三農既而陰氣解駁晴景冲融雲浮浮其若練
山宛宛其猶龍鳥嚶嚶其相樂木翁翁其成叢平疇漲
萬頃之綠竒葩吐千林之紅客有登空山以遐睇鏘環

珮於雲中藉綿綿之茂艸蔭落落之長松暝靄迢遙空
之孤鶩天風度荒寺之遠鐘俯仰宇宙披豁心胸但見
火輪千丈西渡銀海涌出萬朵金芙蓉爾其霞飛林表
煙斂天末柳暗歸鴉簷喧乾鵲送西山之夕陽掛南樓
之朱箔槐色浮而庭宇清花陰轉而簾櫳薄細帙曬于
芸軒酒旆揭于山郭烏犍耕白水之涯紅袖舞清風之
閣涼入子練衣香潤子錦索於是華者實枯槁者活疾
者瘳憂者樂三辰得是雨而澄明兩儀得是雨而開廓太
和得是雨而流行沴氣得是雨而銷鑠彼棠谿之金美則
美矣而惠不若是雨之博垂棘之璧貴則貴矣而恩不
若是雨之渥飛潛動植皆為之甞舒耆耄幼稚皆為之

欣躍信天下之至寶非一物獨得而沾濡誠宇內之奇
珍非一人獨得以囊括天降斯雨豈人所作人被斯澤
非天曷託彼有備百禮以禱於鬼神者孰若精一心以
求於冥漠也臥雲子復怡然語諸鄉大夫曰始而不雨
吾意天實珍厥下民矣既而大旱吾意天實殞厥下民
矣一雨如沐九土皆春天錫吾氓惠也孔殷吾將結
青山以為侶招白雲以為隣耕田讀書以終老於滹水
之濱迺歌曰雷雨滿盈子蕩乎無垠氣化迴薄子出乎
無門使天雨玉子曷若野橋流水清無塵使天雨珠子
曷若石田茅屋屯秋雲吾何以酬天地之大德子惟有
丹心寸一橫蒼旻

詩

王氏別墅

旭日照遠水搖映青松林丹霞散餘彩翠煙鬱鬱沉沉好
鳥弄晴晝嘉木敷繁陰天虛風物幽高爽澄清襟解琴
一奏之細和山水音嘯歌以相羊頽仰獲我心栖遲歲
年晚將歸故山岑

送李順文

維齊古青州其地山水秀嘗遭國大侵夾輔猶腋肘宅
土稱上腴財賦等淞右竒聞久乃隳完城失封守妖盜
起潢池眦梁哀林樾白晝燒通衢胡馬相踐蹂屋化飛
塵灰莽莽草木茂往年大姓家存者無八九兵興歲無

虛穡事廢南畝紛馳赤白囊烈勛竟何有上貽國之憂
軫念夜達晝簡師行天誅岌岌不敢後秦中出精甲長
道屈群醜言言七十城易若摧瓦缶大野息烽煙多士
釋介冑兩河關梁通中原絕紛紜行者如蟻旋居者如
輻輳濟南李徵君累葉文獻舊躬耕食其力田園如錯
繡自經喪亂來避地東西走草食面削瓜布絮體盈垢
先師有遺文一一付君_手萬死逃一生收藏免脫漏吾嘗
觀其書篇章燦瓊玖讀之京華館霜月動虛牖尋將刻
棗梓上儷鍾鼎壽古稱賢弟子君乎實無負始予未相
識聞譽則已久昨枉過山齋衡扉竹外候吐飯欣接之
笑語忘辰酉論議悉超絕白日雲霧剖讀書不窺園林

膏在研究巢由尚羊裘祿仕不挂口譬之天馬駒不肯
戀棧豆裏糧出都門歸期迫夏首春容耀桃李川色潤
拷扭太行入青雲千峰淡如帚黃河浪卷天風雨怒蛟
吼路經百戰場青苔白骨朽抵家拜丘墳狐狸上荒阜
俯仰成古今野哭雜山溜莫傷門祚衰晚節當大就立
言紹前脩蚤夜獵文囿為國植英材民俗盡歸厚我家
漢水上昔別齒尚幼難危十餘年骨肉知在否君歸我
何如涕泗滿衣袖執手河之干臨風一觴酒人生會合
難豈不懷親友相期保令名良時不可又

江皋圖

江晚月未上白煙滿芳洲雨止山氣佳衡扉在巖幽浦

迴沙漫漫松溪露浮浮水田蚤稻熟稍欣獲有秋曠爽
來清風朱夏炎歎收野人樂江居垂綸水西頭得魚送
隣家酒好仍見留童州喜相隨浩歌送飛鷗古時放達
人傲睨輕王侯焉能繫塵鞅憧憧為身謀我家漢水上
田園雅綢繆穀苗含惠澤井洫交新流收穫賙族黨矢
心良不媮一自來京都星霜倏十周寄食仰俸粟曷免
生事憂藥物糜病身曠望增夷猶翩彼南飛鴻肯寄音
信否

阻雨題栢山驛壁

黯淡連朝雨山窓透微涼絺衣含秋潤散髮此相羊白
鳥啼青林澗水亦浪浪隱人不可見思之雲路長歎歌

忽終晷西日下平岡

富庶驛

羸馬下危坂返照在西林長風度清壑澗水鏘玉琴好
鳥鳴幽谷晴雲起高岑解袵背村塢小憩青松陰嗟我
忝代祀凜凜懼不任巍巍廣寧祠曷隔遼水潄龍光遠
被之紫氣鬱沉沉天香動草木翔舞有胎禽黍稷不疵
癘雨露照以淡靈怪亦率職田野絕呻吟顧予蟻蟲臣
至喜動微忱茲願倘可遂庶慰吾皇心

山中書事

圖史列座隅深居愜幽情屋上青山多開軒眼增明白
鳥煙際來清風竹間生抱甕汲新井佳蔬有餘馨懶散

時自適收書松下行青苔沒屨跡涼露尚沾纓入雲問
山寺忽聞疎磬聲

松下鼓琴圖

兩崖何蒼蒼長松在高岑月出屋東頭微雲生夕陰道
人眉宇靜松間調素琴商聲泛林莽流水為知音我欲
往聽之青山白雲深

仲冬月

斗杓建子仲冬月曉天雲掩殘月魄滿城霜氣利如刀
敞褐蒙頭出不得旭日無光風伯怒冰合水泉厚地裂
憑高曠望目力超瀚海天山千丈雪波濤永閔蛟龍宮
原野深藏狐兔穴南山榛栗盡枯死出獵何人馳駟馱

俄頃風收氛翳開萬里雲天青帖帖青旗颭颭酒家樓
杖頭恰有錢三百何物小鬼為侶儔座上能詩有仙客
月斜醉倒花樹下銅龍漏下五十刻

壁間雜畫

山中之人氣奕奕愛畫雲山與水石遠山近山恣一揮
頃刻生絹數千尺今代只數高尚書妙處不減米家筆
後之善畫者為誰青山白雲久蕭瑟忽驚座上煙靄生
漠漠平林翠如織平生夢想不可到乃在君家雪色壁
花發穹林破曉紅水合長天蕩晴碧蘆邊雁影落迴汀
沙上漁蓑斜日白髮蒼頭四老人棋罷松間坐爭席筭
皮笠子大如傘歸去不愁山雨濕爐經九轉鍊丹成杖
掛百錢沽酒喫眼看此景不可親况復憧憧事塵役會
須結屋山之阿更求好田水之曲野人生理日有餘耕
歸牛角懸書帙茆簷夜火促寒機古甸秋風收晚粟安
車若便下丘樊為執先生不可出

福源精舍

京城六月日如火風軒散髮執書坐頓嫌城市多煩囂
欲買田廬何處可素几茶甌吹碧香有客敲扉偶相過
為言越中好山水厥土膏腴不偏頗魏氏之子文貞孫
玉樹臨風色嗒嗒讀書澗水之東頭菟今換古以自課
夏蓋湖光白湧雲福祈山氣青浮座三江帆上暮天長
八月潮平秋水大亭邊獮援長如人月黑林昏盜山果

桃源人家疑此是洞口雲深畫無鎖百壺滿醉江南春
擊缶高歌兒子和西蜀少陵恒苦吟南陽武侯尚高臥
文貞昔在貞觀中大節堂堂不終挫好將舊學佐朝堂
行見英風振頑懦索居何日賦歸來盡理遺書載輕舸
我昔耕牧峴山陽門前水田足杭糯十年道阻不可歸
江上秋風茅屋破舊栽松栢定成林石墻竹梢添幾箇
向來耆舊安穩無每一思之淚交墮福源林壑倘見分
卜隣擬住山之左客歸好語仲遠君歲晚寄書煩報我

墨竹

近來海內稱畫竹息齋筆意何突兀蒼然寫此風露枝
墨花落紙秋萬斛怪處不減文湖州展玩晴窗醒心目

竹邊巒石更坡陀便似著身游嶰谷青谿過雨山霧寒
白月出林煙水綠葛陂老龍頭角禿夜嘯雲氣黑如沐
白晝恹慄炎歊收展書宜趣清陰讀我有竹林漢水西
兒時學種如種玉春翠森森抽細笋風碧娟娟散幽篴
有客清似王子猷拄杖敲門往來熟欲歸料理不可得
夢逸江村白沙曲安得大絹長丈餘請君為我作橫幅
寫我只作六逸儔掛在秋風江上之小樓

題畫

山翠浮空初過雨山麓晴雲散芳渚霧合長林生曉寒
人家更在林溪處澗泉六月翻松根石洞千年隱仙侶
有誰共奕橘中來無人問路桃源去白煙遮盡青林花

野菽嫩香應可茹清幽不減山之陰只欠蘭亭列觴俎
誰乎寫此怪而竒莽莽雲山入毫楮細看猶有遺恨處
胡不著我山之墅我生本是丘壑姿誤落京塵幾寒暑
小時耕牧峴山陽閒從野人學種樹門前魚浦啼竹禽
屋上雀巢走松鼠獨行采藥日暮歸纔得芝朮一斗許
縱令服食不得仙何若長年藝禾黍小村秋晚鷄正肥
大甕春浮酒新煮老翁醉舞兒子歌笑語喧譁忘賓主
此樂不見十許年兵火煌煌照南楚思歸見畫萬感生
悵望風颿橫浦溆時清即好謝官歸全家移向山中住

黃崖寺

黃崖秀絕不可畫山際飛雲如走馬東來無此好雲林

況逢野衲同清話茶煙侵午客題詩松籟吹涼僧結夏
人間塵土誠汙人何時息影禪林下

寄江都縣丞求船如東都

候船十日留瓜渚寂寂衡扉隔霜樹江頭白浪大如山
空外青山橫一縷出門顧影與誰儔市上泥濘過尺許
愁來買酒醉秋風睡起開軒看山雨棄家辛苦如金陵
夢繞山中讀書處今茲胡為乎久留行止闕天非不武
江都貳縣才且賢念我飄零留我住高情好逐萬里風
穩送孤帆過江去

漁陽客邸

城外青山濃似綺屋裡琴書靜如水石爐添火試松香

裊裊篆雲飛不起天涯倦客此停驂
茶竈煙銷猶隱几
奚奴呼覺日平西一片秋聲響窗紙

柳居圖

先生夙華川山中好隱居門前十柳青
扶疎種來不記幾歲月生意藹藹充吾廬
先生一生好心事放跡其下樂有餘
垂垂露葉覆軒戶燦燦雪絮吹琴書
清風蕭瑟來枕席流水汨瀨鳴階除
或逢樵或對漁隔浦蕩輕航呼童
中小車丸藥聽黃鳥攀條穿白魚
野老爭席樹陰底涼影團團搖酒壺
山中之人有天趣丹堊點染成畫圖
若非下惠當時宴休處定是柴桑處
士之故墟自持御史節朝夕賦歸歟
載歌柳居柳臨觴惜居諸既不能歸
田重培育又不能馳書問何如風瑟瑟
動干旛露滑滑沾珮裾千絲萬縷亂心
曲渺渺遙思飛雲衢寄言子孫愛惜之
要使清陰大茂吾里閭

雪溪漁隱圖

窮陰塞玄冬萬里起龜色爰有子陵之
徒住在溪上頭渺渺孤舟釣風雪玄冥
尸化樞天地為冰壺霧散煙銷野馬死
溪山佳處好隱居繁雲舞空雲黯淡長
風捲海天模糊壯哉滕六大有意為我
漁家掃出萬幅真障圖真障圖世莫比
一釣鮪與鱸再釣魴與鯉三釣鯨與鰲
生殺在釣餌失之何足羞得則良可喜
今者得魚亟烹之婦曰有酒無憂矣
酒更爛醉臥蓬窓船頭雪淡尺有

咫尺酒醒推蓬一開眼茫茫萬境白於紙乃知江湖之上
多高人借有駟馬高肯車安肯起讎太公友嚴子何妨
老作煙波士湖之濱江之濱書可讀穀可執君將忘筌
予避世

紫荆關

吾聞紫荆關是古來天險處勢逼恒嵩抗天柱棧路迴
出青雲端巖瀑喧虺噴洒長空對之可以湔塵慮往年
龍虎紛拏戰血飛煌煌萬騎關前駐只今平世天下清
千里桑麻旆旆連郊墅行旅不操寸兵甕城不勞鐵鑄
王元不奉函關泥孫子不書馬陵樹關南孤戍夜火稀
關北園茅小家住今我自西來飛霜滿衣絮林下有高
人怡然此相遇煙霞郵館此停驂風雪軒窗夜聯句家
山咫尺望不迷寫書先寄賓鴻去須臾日車飛上扶桑
紅一騎已出東山東

正己堂

登君正己堂聽我正己歌大質不返混沌死羣邪乘正
勢駢羅乃知正人必正己己既不正如人何惟彼古君
子卓哉心靡他力正學嚴切磋敷正道貴漸磨吐正論
排私阿誰其似之陳幕長壯顏毅色橫星河秉心一以
正心源澄朗無驚波居家一以正家人唯諾春陽和蒞
官一以正官曹肅睦無譴訶朱絃泠泠白日靜玉樹皎
皎清風多素絲羔裘潔如雪自公退食何委蛇乃知穹

壤間細大理則那乾道失其正陰陽寒暑皆錯訛地道
失其正山川草木皆札瘥人道失其正綱常典禮皆偏
頗史之直汲之戇推強植弱橫金戈明廷一日振風采
凜凜正氣永與金臺萬古同巍峩

湘中老人圖

湘山高湘水溪樹森森湘猿吟日將暮翠霧丹霞滿芳
渚碧草淒迷南浦春紫蘿搖動東風雨龐眉野客來何
所袖拂輕颿過孤墅掃苔坐讀黃老書展卷之間會此
千古之竒趣九嶷飛翠空中來路逸蒼江獨歸去雲漫
漫煙水寒日恹恹江雪殘浩蕩孤懷渺天末珮環飛上
青雲端雲白山青互吞吐蒼茫隔斷來時路古人已逝

等埃塵招魂不歸正愁予空留糟粕在人間地老天荒
竟何補何時掛帆直上海之涯為看湘中老人讀書處

瞻雲圖

朝出看燕山雲暮歸行燕山道道傍雲氣光動斑斕衣
千里飛來白如埽長天愁迴陰冥迷虛室宵清神皓縞
太行一髮半落天之南翠彩浮空散文藻縉山更在天
南之南海樹邊白髮高堂歲晏驚寒早三年書斷安穩
無每一思之心慄慄風迴雲杪思飄揚月墮雲西夢顛
倒白雲半幅細入天機中寫出狄公心事炯炯隨雲照
穹昊雲無心人有情物易化情難老朝看雲暮看雲縉
山佳處安得乘雲忽飛到雲中人拂黃中山中雲護丹

竈從龍奮迅直上青天飛變化無方契玄造天下蒼生
正須霖雨之慎勿棲巖扉閱鴻澤負明時

松雪翁畫馬

西海之西天地翕合敷靈氛天產天骨超崑崙月窟而
東而北幾萬里是馬乃能籟星辰踰渤澥掃空冀北凡
馬群曹將軍是開元以來善畫者蚤以絕藝動紫宸不
問驪黃與牝牡筆力到處春無垠往時嘗見一二本世
之畫者徒紛紛吳興學士昔在詞林館畫人畫馬咄咄
能逼真玉堂朝日射碧瓦瑣窗晴雪吹青春文章之暇
奉詔寫龍種水綃萬幅清無塵此馬神采更飄逸妙處
不減曹將軍飛雲滿空散靈雨五花凌亂曉濕蒼龍文

人言此是明皇御愛者天香翁鬱飄滿身瑤池渴飲雪
澗養霜蹄迴踏雲嶙峋黃鬚圉官似是太僕張景順自
幼調馬馬亦馴想當牽來赤墀下皎如飛龍下天門山
齋看畫白晝靜丹粉如沐清心魂龍媒一逝九霄隔龍
沙泱泱霜風昏縱令有馬無善畫誰與寫之傳世人吳
興自是古作者高風遠韻不可聞九原安得起公死請
公為我放筆電掃層空雲陳君愛畫不弱南金與西玉
百回展翫當爐熏南金西玉可力致嗟此神物夔然獨
立而無鄰烏乎神物為物固有神直恐變化為龍飛上
清都紫微之帝閣

呈縣公并柬判簿長司

北方守令之才幾人得似賢侯者炳烈聲光動朝野金
莖承露曉蒼蒼玉樹臨風秋灑灑惟茂恭與遂霸侯也
直欲躡足青雲攀逸駕三年理劇割牛刀生齒林林沾
惠化風迴芹沼汎吾伊水滿稻田抽穰極花村社鼓林
邊槲茆店酒旗煙外挂啁啾絲管勸農歸杏雨滿紅撲
馬五絃清響奏虞歌三峽崩濤翻鄴瓦去年上計如帝
京袖拂天香五雲下竹馬重迎郭伋來和氣歡謠騰羨
舍騰羨舍揚休聲談鋒磊落肝胆傾往時上策登轅門
竒氣萬丈橫秋冥六韜三略常在手擐甲上馬忼慨踐
虜庭黃金散衆虎旅集紅旗渡海鯨濤平只今太平不
用武狂鼙不鳴鷄犬鳴況侯豈弟愛百姓東郊西社歌

豐登邑有倅弼厥成能幕有長贊厥成如此一時賢令
佐不若同氣好弟兄三花歲筵月窟靜八窗窈窕冰壺
清嗟宵人藉培育翫麟長軀但食粟孔融豈計酒長空
鄭老惟憂飯不足負米歸來氣恹悽風雪連天遮草屋
短衣破帽入新年抱子簷前曝朝旭喜隨父老拜旌軒
生意昭蘇迴槁木山之隈水之曲石徑荒寒古苔綠拾
薪暮迓嶺雲還脫巾時向松潭沐侶魚蝦友麋鹿牛角
挂書田裡讀漢家史記滿床頭卓魯龔共黃在心目直須
為侯濡毫沐槩紀循良留待班馬諸公親纂錄

琴堂曲為永清劉尹作

琴堂清文窗窈窕雲霞明七絃彈出太古意光風繞郭

流春聲流春聲滿天地泛羽浮宮蕩和氣惟侯之政廉
而仁敷曾惠慈湔暴厲惟侯之心公而平槩發伏姦施
愷悌視民如傷民德之生意昭融一時寫作琴中趣堂
上琴音沉沉玄猿抱月啼空林琴上絃聲淵淵老蛟臥
雨吟寒泉有時拂軫青松邊白雲飛來清可憐有時度
曲香案側水沉鬱鬱飄晴烟此琴不是相如之所舊此
琴不是伯牙之所傳乃是當時子賤古遺物置之茲堂
今幾年縣庭無事簡書靜抱琴危坐心悠然古風寥濶
不可續侯也直須為秦周詩三百篇世雖久之知音者
時復鼓之聊以陶吾天馳聲海內永不朽七閩山水萬
古增光妍我欲學琴恨無緣我欲買琴苦無錢山空月

白琴響絕把杯長嘯天風前

送李希文典教東船里

送君行君行直到東船里風物幽迥宛似江之南土壤
肥夷可藝稷黍茫茫墟市隔林泉寂寂蘅茝蔭溪水天
空鷗鳥間地古風俗媿鏗旬教鐸振文聲子衿揖讓春
風裡我欲乘風直上海之涯魚龍掀舞煙濤起老翁曠
網立船頭兒子叉魚傍船尾灘聲奏曲響琴窗水芳吹
香墮書几先生宴坐清可人陶寫神情舒四體攜壺觴
臨沼沚或開襟或洗耳或賦長歌詠古今或棹扁舟弄
清泚世間萬事豈足掛心旌為問此樂平生還有幾我
欲誅茅結屋與君隣我欲浮家泛宅學丹子雲水之間

栖遲之樂可以忘歲年不知老之將至矣

石鼓歌

乾坤清淑之氣蜿壇扶輿亘西極化作岐山之陽石鼓
十六丁二酉劇斷崑崙之瑤峰縹緲雲根墮穹碧層崖
秋碎方祗愁大星宵隕圓靈泣中虛不露疏鑿痕文太
素猶涵混沌質偉哉周家宣王中興時戈鋌慧雲九縣
一明堂受朝群後來天威不違顏咫尺岐陽之狩載揚
國之靈王氣騰霄何赫奕八鸞聲夏秋風高九旗光動
朝暾赤歌車攻詠吉日張皇維昭帝績泰山盤石之固
祚炳烈千萬春勒之貞珉古無匹其形如鼓不可扣之鳴其
體渾淪絕似大造無痕跡其字道逸宛是篆與科其文

古雅髣髴周之什吉甫歌史籀筆制作森嚴照岐邑年
多物化理則然金字半滅無人識老蛟摧裂野火焚古
墨淋漓苔雨蝕青城學士昔在太德初見之林下久嘆
息入朝亟為丞相言如此至寶何可以弃擲大車彭彭
之輓致來孔庭天地風雲亦動色我嘗愛此石鼓文字
竒撫玩摩挲不知日之夕荏苒光陰數十春春風吹愁
髮生白近時再過石鼓傍堦草蒙茸沒雙屐細看字畫
轉公磨徒倚迴廊淚沾臆東安鄧尹彈琴青桂林議論
文章脫塵俗平生好古如古人直欲蒐抉周秦之故實
里中更有朱先生白首著書窮目力寄書遠訪石鼓文
細字滿牋珠的礫書中宛宛見高情識者見之爭愛惜

乃知好古不減吾鄧侯吾徒委瑣豈復如先生喜新厭
舊猶戲劇吾友秦郵李希文新來小篆亦傑出夷門梁
君子宜苦學張顛之草書電掃千章爛如拭我生雅恨
不能書每見名家如有失朱先生古遺直甚欲相從不
可得山中茅屋書滿床何時一到虛軒分半席直須和
我石鼓歌戰退蘇韓入堅壁烏乎古之作者往往苦用
心豈惟杜預雅有春秋癖今人無復見古人徒勞紙上
賞遺墨魚目滔滔久混珍後來此鼓誰收拾燕之石等
圭璧荆之璞同瓦礫古風不返天茫茫何如爛醉林皋
臥苔石

雙節詩

明山青鄴水碧山水之間好田宅宅前華表高出青雲
端金字雙題燦星日秋窗隔樹霜燈明白髮嬾姑宵紡
績水寒績斷心緒勞門掩淒風抱兒泣風吹兒聲轉飄
揚愁雲壓樹墳草黃夫君骨已化青天杳茫茫炳烈千
古心迴隨白日懸穹蒼弓冶傳家好孫子丹桂滿林吹
古香異哉一門兩共姜至今大江之南奕奕有耿光我
嘗攷古節婦為傳記積雨林扉散秋氣雲開日出海霞
飛萬丈朝暉射天地無情滄海枯惟茲節婦之婦節古
難斃我生也晚無復見古人唐虞世遠空歔歎安得鞭
豐隆叫閭闔戕皇穹盡令薄海內外回溥風

雙鶴吟

若有太古之僊迺在瀛洲之上方壺之間門前雙雀不
知幾歲月雪飛風舞迴隔青雲端天空月白雙影靜玉
笙合奏瑤臺寒石壇暝踏松子落林蹊晴啄苔花殘仙
翁手執相雀經一卷逸思汎若孤雲間興來引雙雀笑
入三茅山三茅山中瑤草碧九皋雨散春煙濕雀飛亂
點層峰青彩鳳蒼鸞往往與相識價重不減雙南金質
瑩不弱雙白璧不慕懿公之華軒不逐王喬之飛舄不
巢西湖處士之孤山不憩黃州謫仙之赤壁栖紫霞護
丹室六翮稜層曝朝日友茅君呼木客盡日聽琴香案
側山中之人問詢時相過蟬聯飛遶羊公石雀之逝風
翩翩遙空碧落秋無邊雀之返山娟娟紅塵不到芸窗

前恍如元方季方在潁谷倏如陸機陸雲來洛川燦如
同穎之禾敷秀唐叔壤宛如王雎之鳥著美南周篇薛
公之鶴何其夥趙抃之鶴何其偏異哉兩仙骨不偏不
夥全其天問雀往時托巢在何許邈在遼海之東華表
柱問仙豈雀到今凡幾春前五百年嘗與令威一相遇
鶴飛來向何所不渡海之涯不涉江之浦直欲飛上近
天上神仙之官府天門寥濶不可通誰到十二瓊樓最
高處莫延佇鄧林之廣豈無一枝之可栖何為乎涉雲
霄冒風雨春去春來恣軒翥仙亦竟不留雀亦更不駐
仙即雀耶笑我蹶躡於風塵相隨上青雲去

蟬嘒嘒老樹秋風暑初退閨門忽起思婦悲歌枕聽之
墮雙淚去年夫征淮水頭天明上馬操戈矛今年夫戍
玉關塞日夜躑危誰足賴不如爛爛雲錦機織成迴文
製君衣不如湛湛長江水流恨隨君千萬里白首會面
知無難願君竭力軍旅間太平無事荷帝力遲君歸來
慰家室鑿鑿之石如妾心空山絕磴秋嶽崱青山之松
如妾操大雪嚴風不凋耗石或可轉松可摧妾心萬死
不可回

暇日與客出忽大雨倉皇無所避頃之聞市中小
屋呼曰青霞裳涉水就之主人欣然相留俄而陰
雲四豁紅日青霞閃映可愛但流潦如奔泉平地

成大河時小兒六七浮木為舟作水嬉因以木閣
水際度坂塗踰數十舉武總揚秘書曼卿先生家
將歸雨復大作又憩僧舍至晚不可留也乃歸明

日賦其事與客一笑時年二十四

黑雲如山白雨傾神怪出沒雷電驚走避人家屋簷底
平地成河斷人行此時惟我與一客只恐水深歸不得
疾風吹樹如捲濤城上翻飛墮楓葉劃然開霽天色寒
五鳳樓閣青雲端河橋酒旗曬斜日恨無千錢此盤桓
褰裳涉水泥到膝倉皇不復辨南北市人如蟻歡相呼
古濠積潦深三尺秘書宅前芳樹林翠陰滿地何蕭森
主人愛客欲少住鮮飈入閣開煩襟出門復憩秋水寺

四顧徊徨雨如霏天昏地黑蛟龍愁我行如渡銀河去
安得渥洼龍馬駒乘之白日朝帝居只今汨沒在泥塗
非癡非狂亦非愚人亦寄耳晦明變化知何時

度居庸

歲暮矣風淒淒車中行客胡不歸一車南一車北南來
北去何時息車行欲近關上頭鞭牛不前吁可愁須臾
推挽在平地車中兒女歡且謳短褐蕭蕭風雪裡山徑
荒寒多虎兇呼兒取火供晚炊瓦釜黍米和沙煮黃昏
露宿官道邊茅店鷄鳴載行李殷勤起謝車中人萬嶺
千山多苦辛嚴風吹霜皮肉死一身只有筋骨存安得
筋骨化為山下土填却千山萬山無險阻盡使行人免

愁苦

贈周掾

揚震辭金廉以公釋之審讞仁以忠誰其似之君卿氏
直與兩賢齊高風周公善政久顏敞秦漢而來由吏治
煽威作福誰禦之如以蛟龍視螻蟻君昔試吏西曹時
以廉律身人是之豈不知蕭相曹侯稱畫一當時皆白
刀筆出

上總戎

大將軍出沙漠萬里河山盡開拓馬嘶紫塞霜草寒雁
飛白海煙濤濶旗拂戎帳空箭穿魯縞薄虜其名王歸
四面凱聲作功成獻俘蒲萄宮天青日白開鴻濛遂使

樓煩林胡之遐壤化為冠帶衍為提封明年草青春色
濃征人解甲醉臥林花紅我恨不識趙充國又恨不識
塞上翁拔劍起舞歌春風

大雨喜晴奉贈巖栖賢尹蘭莊廣文鳳臺之行

昨日雨方休今者復大作蜚廉鼓索震霄衢淵客泣珠
送谿閣白海飛流紫塞空銀河倒浸青天濶三閩遙九
源合舟迴誰復辨渚涯郊行何處尋墟落稻葉青起風
幡幡野田綠滿水活活吟臥聽琮琤樵歸迷略約蝸廬
一片林煙昏鷄塞千營纒帳薄雄縣城中百數家東街
西街平地成谿壑瞻飛龍聽鳴雀吾獨胡為久困泥塗
中何不乘風破浪從此以揮霍破室燈昏仰見天一夕

九徙不得眠大兒愁衾裂小兒嫌履穿芒履窗內外瀉潢
潦葵砌高下奔清泉虛牖風顛亂舞壞墻泥墮高帽
偏衰翁避濕龜頂縮稚子擎蓋爲肩旋滂沱急霏烏鼠
穴紛霏亂點魚蟲篇劃然快覩好晴景金臺千仞青雲
端掃碁局揮酒錢酒邊舞影何踈躑何踈躑欲掀舉花
縣芹堂捧幣函香覲鶴籞丹心炯炯照皇穹飄縹紗祥煙
飄鷺渚看君增秩賜金歸盡把鴻恩化作溥天之膏雨

一山文集卷之一

一山文集卷之二

詩

龐村

野曠煙花白林深露草香雷聲送雨過山氣入雲長
遠水鷗邊淨薰風馬上涼長亭無限好暫此解行裝

盧龍二首

迢遞盧龍塞蒼茫灤水波青林雲氣重白碣雨聲多
四皓終歸漢隱三良謾有歌秋風闕海上回首淚滂沱
足馬空山路孤煙老樹村松陰連草屋澗水遠柴門秋
晚蜂成蜜年深鶴有孫行藏吾道在白首信乾坤

秋日山行

林路鬱迢遙村行野興饒
西山青入屋一水白平橋
埽石收松子耕雲種藥苗
仙人王質輩應向此中樵

贈杭州包知事與直

大府包從事才華早見收
孤忠橫北斗清節照南州
白雨江帆暮青楓水國秋
向來憂世意惟有淚長流

旦起

曙色動高城鐘殘櫂馬鳴
千門春放暖十日雪開晴
勳業非吾事詩書寄此生
青衫玉粲老猶欲俟河清
飛觀連霄漢山門一徑幽
青林藏雨暗白水抱城流
未脫塵中趣虛傳物外游
回驂西日晚清磬起層樓

出獵圖

大漠陰風起煌煌獵騎來
關弓霜月滿吹角塞雲開
射虎慚無術呼鷹謾有臺
蕭條空見畫粉墨亂塵埃

早過五門

霜白掖樓曉寒鴉城上啼
微雲閭闔外斜月建章西
憂國心常切成功計轉迷
十年京闕下貧病尚羈栖

天界寺

諸山繞天界千古鎮皇維
螭護階頭石龍蟠殿角碑
慈雲籠寶樹佛日轉瑤墀
六合資冥福春風萬物熙

養魚池

涵空一鏡碧日晚出織鱗
挾雨隔滄海衝波碎綠蘋
汚南誇丙穴周什薦嘉賓
白首清江曲誰憐獨釣人

鳴皋亭

青年一片雪縹緲落秋雲
縞袂風前舞瑤笙月下聞
聽琴多歲月衝錫出塵氛
寄與乘軒者芝田好共分
與薛十二過壽寧精舍得歌字

鳴雨過青嶂飛煙繞碧蘿
庭空留鶴跡江靜聽漁歌
長夏迎人少高年禮佛多
飄飄飛錫處千里又相過

夕次同川

鴉噪晚涼天新晴景豁然
柳橋過水市荷港入湖田
鷺影沙頭月人煙渡口船
相過又相別書到是明年

贈鏡上人

山館夜蕭蕭天寒酒力消
雁行衝雪斷燈影隔江遙
渡

口人爭岸船頭客待潮
倦途誰慰藉風景不相饒

贈邊將

猶記登壇日長驅破虜圍
兵隨營火出血灑陣雲飛
殺氣吹戎帳腥風拂鎧衣
肘懸金印大功壓萬人歸

舟次松陵

客路幾時盡愁懷到處同
斷帆衝暮雨短笛咽秋風
水碧沙雲白山青柿葉紅
莫言詩費日光動錦囊中

望海虞山得蹤字

青山秋萬疊詩寫晚愁濃
瀑斷峰頭路雲藏谷口松
藥爐丹氣上經藏碧苔封
誰似仙翁靜塔前掃鶴蹤

水閣夜坐二首

松風通清响竹露滴涼秋天水靜涵月照見浮生浮

又

魚跳動水影蟲落打琴聲開軒掃明月吹簫送殘更

初夏雨坐

白雨傳疎點紅亭納快風荷香清浦近竹暗細泉通問
道隨閑尹橫經媿馬融衰遲竟何補江海任飄蓬

和睦公九日韻

秋聲橫笛外曉色畫屏中黃菊雙頭小青山四面同船
衝官浦雨木落市橋風十日燕臺路途窮興不窮

窓燈

窓燈搖影細城柝報更遙白髮愁偏重丹心老未銷雲

陰籠月薄秋氣挾霜驕歸思如江水滔滔逐逝潮

晚出

短策扶衰病輕衫受晚風煙花連浦白霜葉墜林紅骨
肉兵戈裡乾坤涕淚中飄飄江海上回首媿漁翁

抱病

力疾秋風裡扶筇步晚晴霜林朱果落江浦白雲明喪
亂逢多難飄零媿此生故人分散盡懷抱向誰傾

春日郊行二首

宿雨沾花潤春風步屨輕石門雲氣白野寺竹陰清魚
鳥親人喜山林照眼明乾坤任疎放杯酒度餘生
翠柳含煙碧山桃噴火紅長松落晴雪袂薄受暄風伐

木隨樵子攜錢就酒翁猶勝狂阮籍白首哭途窮

讀賈誼王粲傳

白髮悲王粲青春羨賈生萬言詞慷慨一賦氣崢嶸
屈心猶壯依劉恨未平懷賢坐長夜斜月半窗明

和友人韻四首

亂臣傾廟社禍本久胚胎萬里金城壞千原鐵騎來
人心今日異天意幾時迴痛哭英雄老淒涼臥草萊
恩幸千年遇艱危一旦遭人材淹草莽勲業付兒曹
死戰酬明主兼金買佩刀歸來衣甲破蟻蝨費爬搔
月黑妖星現雲紅戰火燃魯連終蹈海樂毅又辭燕
痛哭懷明主匡時倚大賢那堪頻眺望白雁落霜天

秋氣滿龍漠君王忽遠巡旌旗照天地哀痛著絲綸
雨雪迷青野風雲動紫宸汾陽忠烈大一戰熄兵塵

宿嘉祕寺

寂寂青山寺千峰翠欲熏禪林黃葉落僧飯白猿分
松磴吹晴雪柴扉鎖暮雲悟窮清靜理莫遣世人聞

山中值雨

秋聲橫笛外曉色畫屏中黃鞠雙頭小青山四同面
船橫官渡雨木落市樓風十日燕山路途窮興不窮

秋日雜興

飛樓上倚次寥天野色荒涼萬井煙落日荷花白舫外
西風桂樹畫闌邊明妃夜泣琵琶月宛馬秋肥首蒼田

千古河山幾爭戰一登高處一潸然

寒食

歲歲京華庾禁煙房陵兄弟虎狼前莫傷佳節愁邊過
且放淡杯花下傳短枝自慙前席名多貧猶得故人憐
王師早晚清畿甸穩種城南數畝田

清明游城南

立馬高原黃霧消近城墟落亦蕭條人家上塚酒來飯
野老鋤雲種藥苗紅日金臺晴靄靄白鷗春水暮迢迢
移尊淨掃莓苔坐多謝青山慰寂寥

寄省掾趙晞顏

不見先生十日餘臨流每欲寄雙魚馬卿賦好君王識

阮籍身閑禮法疎落花啼鳥紛紛亂澗戶山窗寂寂虛
春興定應題滿帙病中何得慰躊躇

自述

八口淒涼生事微中原羽騎日駢駢天寒歲晚歸難定
水遠山長信轉稀青眼故人頻送米白頭慈母尚無衣
蕭蕭漢渚蒹葭老好向兒時舊釣磯

送別

北風吹袂晚臨歧日短天寒獨去時遠海漲空雲泱泱
亂山連塞雪參差煌煌兵火家千里寂寂生涯酒一卮
傳語親朋好調護路難莫怪寄書遲

山居

小齋清坐校韋編水碧山清照几筵窈窕虛窗雲入屋
蒼茫平野草浮煙塔前村姬春黃米門外溪童賣白鮮
欲賦紫芝招隱士鶴書先寄隴雲邊

雪

地白雲黃雪亂飛虛簷風急撲征衣子猷入夜乘舟去
蘇武殘年持節歸兵後殊方為客苦病來親友到門稀
何緣得似兒童歲貂帽狐裘正打圍

開門飛雪疊塔除宛宛溪山畫不如野火遠明喧獵騎
茶煙半濕認僧居雲深空谷難尋路風急虛窗亂打書
坐待春陽迴宇宙無邊生意滿茅廬

河上

宛宛寒山入暮煙河流直到寺門前店頭買酒風吹帽
浦口叉魚雪滿船翻覆世情堪大笑寬閑野屋得清眠
虛堂月色明如畫畫獨坐清彈五十絃

和梅知府寄來詩韻三首

坐想親朋摧肺肝寄來尺素百迴看虛窓琴冊塵埃亂
足馬関山雨雪寒避地十年頭欲白去家千里淚難乾
酒壺爛熳堪謀醉強撥羈愁一畫歡

束裘曉發雪滿路雲起荒山萬里陰菽水久違慈母養
綈袍還見故人心哭憐阮籍窮途晚賦寫江淹別恨深
春滿故園芳草綠東風門外聽車音

離筵酒盡暮煙微兒子牽衣泣草扉萬里風塵諸弟散

十年江海故人稀
少陵苦恨無家別
季子羞誇衣錦歸
謾憶山窗吟嘯處
湘簾花影疊朝暉

灤河

西澗松聲琴筑哀
水邊亭子酒壺開
千年海鶴遼東去
萬里灤河天際來
沙路連城白似雪
山光過雨碧於苔
夷齊餓死脩名在
凜凜清風被草萊

歲晏紀懷

黃雲壓地雪浮浮
虛館開觴散客愁
白髮驚心催短景
蒼江入夢問扁舟
時危每羨檀公策
志大空懷杞國憂
翻憶少年踈放處
春風歌舞醉紅樓

舟次龍江

孤航小駐水西頭
汎汎輕鷗對客浮
海氣漲雲天暫晚
江風吹雨石城秋
已將萬事歸詩帙
苦之千金醉酒樓
欲向金川門裏住
那堪回首戀滄洲

贈時中

白首相逢寥落中
失聲一哭暮途窮
霏霏江草愁邊綠
寂寂宮花夢裡紅
海微歸心懸夜月
柴扉夜月病骨臥
秋風人情任逐東
流水爛熳金樽莫放空

春日紀懷

平湖水碧動晴天
獨樹花明簇暖煙
小白肥鮮堪饌玉
嫩黃新韭不論錢
田園蕪沒從兒嬾
杯酒淋漓任客顛
四海奔馳厭塵俗
百年散蕭愛林泉

和梅尹寄來韻二首

栗烈晨風坐轉嚴日高晴鵲忽喧簷塔前雪洗苔痕出
門外春催柳色添姓字已歸迂叟傳豐穰屢問太人占
村翁野老時相過羨殺香醪似蜜甜
明晨鞍馬去難尋親友留連惜寸陰北極星辰連遠塞
南溟風雪動愁心形容憔悴悲年暮燈火青熒入夜深
回首高歌出門去天涯寥落少知音

暮春喜故人至

衰年懷抱向君開春晚留連把酒杯窗草霏霏含綠雨
林花片片落蒼苔田園成趣聊堪適故舊相逢能幾回
揮翰題橋空有志白頭司馬媿無廢才

乾坤漸老百年身掃地焚香靜裡春巢燕向人爭學語
山盃留客細傾銀迂踈無用真堪笑離亂相尋轉見親
未卜此生歸定處青冥何敢更求伸

雨中偶賦

黯淡青林白雨飛隔花莫恨濕春衣恩沾草木生兼遂
聲到松篁聽轉微谷口泉清舒藥甲巖隈風亂打柴扉
故園有屋多應漏幾日攤書曬夕暉

燕相府右傅王公為北平憲副劉公畫馬徵予為
詩

驍騰迴踏瘴煙底萬騎紛披不敢嘶天繞閩風追日轂
雨收沙苑散霜蹄金鞍光動青雲表玉輦馳馳碧海西

白首何堪攀逸駕幾回執策聽朝鷄

寄思溫尹六首

鷄泉邑裡識君初回首春風似夢餘
惠愛新聞行旅說才名不愧史臣書
花明白日青山靜稼簇黃雲悍吏踈
後夜林扉倍相憶高情莫忘寄雙魚

展卷虛窗風滿襟坐來轉覺秋蕭森
雀翎新沐紫蘿雨雲氣迴隔青松陰
太丘雅稱湖海士徐庶忽起庭闈心
客懷寥落誰與語解榻遲君來聽琴

山齋留客晚涼初茗椀吹香清夢餘
雨過雲生松下石月明風亂枕邊書
一家骨肉今無幾海內親朋轉見踈
張翰秋來定歸去江湖隨處足蓴魚

長松過雨碧蕭森涼籟吹香滿素襟
泉落空潭秋灑灑雲生虛室晝陰陰
塵埃書劍千山路風雨江湖萬里心
客散衡門更清絕月明誰聽紫瓊琴

至道不返太古初玄聖一丟千載餘
養生近得南華論報國恥上東封書
四海無家轉悽惻百年處世何迂踈
從茲萬事可撥遣短蓑獨釣長江魚

虛庭無人坐開襟雲氣滿地何蕭森
老夫懷友傳尺素稚子讀書惜分陰
小窗涼月煙破夕遠道秋風傷客心
羨殺道城令尹好安得細聽堂上琴

定興道中

雨外好山青近人峰迴谷轉兩溪分
聯嵐翠靄浮秋樹

隔塞清笳落暮雲農事喜聽田父說漁歌時近水村聞
只宜濁酒林亭下解帶風前醉夕曛

別山中友

峰迴徑轉雪嶽峯隱者柴門費獨尋谷口斷雲遮艸屋
樓頭斜照隔楓林黃金買貴交游絕白首窮經歲月深
明發分襟兩相憶那堪寥落動愁心

喜王延齡至自金陵

雲屋燈寒夢見君詰朝車馬競紛紛江湖險阻多親歷
骨肉平安得細聞點筆詩篇翻白雪驚人手采照青雲
我衰不入鷓鴣侶還好常隨鹿豕群

詠雪效時體九首

沉沉仙館靜無風光動霄衢縹緲中玄圃暖滿瑤草白
綠窗春綉錦機紅皇天有道開豐稔詩趣無邊入混融
為問兔園張宴處滿堂豪客賦誰工

長風捲海白漫漫三島樓臺畫裡看瑤席香銷金鴨冷
銀河水湧玉龍寒春回萱草芽初出鵬畫梅花信轉慳
清曉天門占瑞象日車飛上五雲端

隔屋狂飈怒擊撞一庭皓綵翳寒釭星妃夜翦銀河水
雲氣朝橫玉女窗梁苑賦成誰第一灞橋人去更無雙
到門疑是洛陽令有客尋詩驚吠厖

留客同傾北海樽疾風吹霰落紛紛虛軒夜氣浮書潤
迴野春聲隔樹聞密洒南樓清護月橫堆西嶺白連雲

呼童閒掃長松徑幾片飛來亂雀群

瓊花春逸畫樓飛畫捲珠簾認翠微影落玉堂翻硯沼
光搖金殿晃朝衣長煙壓樹難尋路遠火燒雲正打圍
明日出門好晴景冰花滿帽散珠璣

雲飛大野曉模糊水國微茫一雁呼風起四簷翻玉樹
天移萬象入冰壺子卿持節終歸漢裴相乘虛急破吳
五稼從茲兆豐稔老農爭說往年無

曉寒着人肌粟生空塔頃刻一尺平開門起視天地白
掃榻坐愛琴書清黃州竹樓驚碎玉許家仙子誇飛瓊
東鄰西舍醉新酒蹇驢細踏春風行

訪戴曾上王猷船持節不齧蘇武膾苦吟傑出柳絮外
清氣迴繞梅花邊芸窗夜白照書卷山肆曉寒增酒錢
安得九夏復如此松下從教驚晝眠

海天空濶白成堆塊北春從地底迴紫禁晴飄龍尾濕
函藍閑寒撲馬頭來婆婆安起舞多妖冶頃刻開花巧翦
裁清氣無邊隨詩境迴排雲氣上瓊臺

題萬松金闕圖

袞冕曾迎鳳駕來煙沉金闕半蒿萊霞蒸日氣紅初上
雲壓松陰黑未開玉井霆轟龍起蟄虛憇笙響鶴飛迴
前朝往事雲無跡愁聽江聲入夜哀

贈古淵上人

歷年轉走虎狼叢名利荒寒到處同杳杳木杯鯨浪外

飄飄金錫蜃雲中詩篇想見推敲熟乘法爭傳大小通
偶此相逢破愁寂梅檀香裡坐薰風

與戴元禮黃山人期登石徑山謁道陵而山人不
至

百年登眺問誰宜澗轉林迴石磴危潮落空江秋笛起
雲生虛室夜鐘遲廟門雨黑愁山鬼塔草霜黃集野麋
天地無情歸浩劫一樽聊復散襟期

京口夜泊

醉客滿船歌月明隔江燈影逐人行帆衝雨脚迴京口
鐘送潮頭打石城南渡衣冠愁北望東臬蕭鼓報西成
桑田海水依然在不管人間有變更

鶴過僧房見鶴喜而成詩

道林深處竹為垣愛爾胎禽喜欲言月下聽琴留丈室
雲邊衝錫入祇園放游芝圃騰清吹碎踏松陰舞小軒
華表秋高看遐舉青天萬里雪飛翻

送呂秀才入道

賦罷長楊戴鶡冠咲人慕道不休官窗前風雪三餘學
林下煙霞七返丹白社年深成雅會紫垣秋靜禮虛壇
夜窗欲問長生術月轉瓊樓十二闌

杏園

好花紅白出鄰牆競賞何妨到夕陽探信屢逢金榜客
看梅稀出碧鷄坊朝霞籠日綃衣薄晴雪翻風珠酒香

我憶城中好庭館幾陪詩老醉瓊觴

亂後入城有感

金湯天險盡成隳遺老空傷漢鼎移城拆亂鳴寒雨夕
酒旗斜掛夕陽時田廬荒棄無人住骨肉奔逃到處疑
最是多情雙語燕向人如訴主人悲

桃松陵獨眺

誰家隔水敞柴扉白浪粘天隔翠微紅葉秋風宮路斷
蒼江暮雨釣船稀尋幽野客攜壺至解夏山僧振錫歸
聖澤只今沾溉處松陵艸木駐光輝

登雅宜山

鷄犬柴扉竹裏開仙人別住好樓臺松聲忽向琴心起
雲起氣遙從澗口來六代衣冠隨水去百年天地逐輪
迴興亡總付登臨外爛醉春風臥碧苔

羊祜廟

勛名冠絕復全身兩晉如公竟幾人廟枕吳江悲故迹
碑沈岷首哭遺民空壇曉霧沉荒樹斷壁秋風掃暗塵
老淚向人收不盡愁邊和淚濕衣巾

琵琶

雨霽銀潢萬頃秋芳妍爛熳競相酬雲山有分老復老
勛業到頭休便休鑿落金杯從浩蕩琵琶玉手喜纖柔
一年無似今宵好醉倚西風十二樓

移教房山留別雄縣周尹

隔水青山畫舫西
亂雲芳艸思淒迷
江淹賦好傷離別
李白名高入品題
落花空塔春色澹
鶯啼深樹午陰齊
明朝相見歸來宦
飛向秋風覓舊栖

雪和饒侔二首

散亂飛霏落帽簷
峻嶒碎玉簇峰尖
野梅放白寒香凍
村醞傾紅臘味添
雲壓蓬婆迷羽騎
風迴金爵撲珠簾
出門三尺無人掃
好為豐登取闋拈
風起六花飛滿簷
倚樓遙認遠山尖
白生虛室靈襟靜
清逼疎梅道氣添
羽駕晚臨瑤島路
犀塵寒隔水晶簾
梁園賦好人爭寫
健筆凌玉信手拈

周大尹惠香

天香滿袖出蓬萊
雲氣溟濛接上台
芝圃秋前新採得
玉皇案側遠攜來
九門傳詔銜鷄舌
百和薰衣咲鹿胎
喜甚蘭交許分贈
小軒焚處靜風埃

和前韻

旃檀林迴絕蒿萊
瑞靄薰蒸自鼎台
旭日蘭和茅露滴
秋風桂子逐雲來
丹爐夜久龍嘘氣
玄圃春深鹿養胎
細掃虛軒執嘉種
斷無俗客踏芳埃

周大尹祭祀還

使旌秋出鳳凰臺
吳楚千峰紫翠開
水伯驅潮推柁轉
豐隆挾雨逐車迴
琴邊白鶴迎仙蓋
席上青雲照酒杯
好是紀行詩滿帙
驚人麗句壓瓊瑰

和前韻

青雲北起望金臺路入瀛洲島嶼開
曉日歌樓湖上出
秋風征旆雁前迴
斷虹斜照參差雨
遠海平鋪激灩杯
好寫江山入吟思
酒邊爛熳掃瓊瑰

雄縣尹周民瞻擒賊賦

獵火宵明雪半乾
於菟盡縛血爛斑
城門鐵騎衝雲出
塞嶺金笳奏月還
葉縣春迴雙鳥靜
偃堂晝永一琴閒
燕臺獻捷恩光近
名重清朝玉筍班

和周尹韻

雨餘秋水逸清軒
心跡雙清好莫言
松寺尋僧陪鶴侶
茆簷對客數鷄孫
年光荏苒驚殘夢
生事蕭條得憶故
園兵後故人知
好在邗堪白首臥衡門
雨送微涼入小軒
日高淡樹聽禽言
松崖花落蜂成窠
芝圃苗肥鶴引孫
黃卷暗銷閑歲月
青山宜問好田園
踈簾清簟琴觴靜
時有高人訪葦門

雪中退朝

雪舞迴廊亂打人
朝回馳馬路無塵
天粘白海橫飛練
風轉彤墀細疊銀
詩氣涵虛清到骨
梅魂襲月冷疑神
直須借與調羹手
遍灑名藩作好春

謝葉奉祠公羽贈冠

蓆帽征塵拂轉難
寄來章甫壓儒酸
逢萌忍向清朝掛
貢禹欣逢故友彈
青鏡不慚欺白髮
丹丘還好覓黃冠

暮年文彩凋零盡誰寫衰容畫裡看

贈雄縣劉尹

老成器業少如公政譽堂堂壓茂恭一片靈臺霜鏡裡
三株仙桂月輪中香凝鴨鼎琴堂雨木落虹橋酒市風
欲寫漢庭循吏傳滿川煙樹晚濛濛

春日

柳外旗亭傍水隈花前留客倒金盃青雲晴抱日華轉
碧草煖隨春色迴遠道自憐衰力盡好懷常向故人開
輕衫短策東風裡白首蹉跎望隗臺

朱長史致仕還里

委佩聲遙轉禁池每依朝彩認龍旗白頭強健追班早

青瑣從容侍講遲天上宸章優老日里中孫子望歸時
多情好是長淮月時遜心旌照玉墀

和安常寄山中友詩韻三首

郭西山好任多年採藥林深踏紫煙黃鳥間關春雨裡
青峰迴合暮雲邊蝸廬踈漏看兒葺蠹簡紛紛對客編
兵後故人成遠別那堪回首竟蕭然

清朝雅望稱高年臺閣文章入渾然青禁從容親講讀
素書珍重問林泉花明別館尋幽到酒熟良朋取次延
寂寞山中舊遊處紫苔蕪沒種芝田

白頭覽鏡愧衰年清曉繙經興杳然山疊錦屏橫斗極
岸分珠雨落風泉夢回隔水聞僧磬飯飽耕雲種玉田

多病馬卿空有賦謝官陶令未歸年

朝使至雄縣理賑民事

燕塞秋風幾日留華筵文采射珠球青雲擁路隨金節
白雪翻歌繞畫樓荒政有條先散利富民得策定封侯
祇存一飯忠君意接武夔龍贊帝猷

挽張及民老先生

寂寞城南一畝宮百年遺響守孤桐巢由杖屨雲山外
陶阮生涯酒榼中祠壁鬼燈燃夜雨墓門翁仲嘯秋風
招魂不隔盧溝水淚洒霜林萬葉紅

松隱

松林宛在草堂西隔樹嵐光望欲迷風磴曉吹蒼雪冷

洞門秋枕碧雲低崖房溜蜜看兒割藥裏關心對客題
南望九華懷李白月明霜白斷猿啼

詠保定尹祈雨

憂心太守祝民禧紫霧涵香護錦衣潭底雙龍驅雨出
廟前五馬踏雲歸銀潢水滿通丹井石室煙深濕翠微
斜日金臺晴景好酒旗風裡麥禽飛

紙

吳繭裁成秋水寒炯然光彩動柴閨香分梅蘂飄金潤
色奪梨花襯玉環石几淨堆春雪冷瑤窗輕拂曉雲間
東林白社多年別好與題詩寄還

山北僉憲黑思仲義以宗正郎中召還予時在會

州以詩送之甲辰歲月云

千里關河積雪深
星輅西發馬駸駸
黑山霧雨連窮海
紫塞風雲接上林
到闕應持御史節
上堂先慰老親心
邊城日晚多豺虎
送別那堪淚滿襟

登隗臺用希顏韻

好風吹袂上金臺
旋脫貂裘換酒來
春日郊扉光黯淡
夕陽樵路水縈迴
都人猶記燕昭事
朝士爭誇郭隗才
千古興衰總陳跡
斷碑剝落臥蒼苔

送翼王歸相州

千營兵氣黑沉沉
關塞蕭條草木深
蛇伏黃蒿噓毒霧
鬼吹青火出空林
兒童老大不相識
墟墓荒寒只自尋

親在遠遊須愛惜
書來應抵萬南金

雨

熟睡昏昏白晝長
翻盆急雨洗炎光
天連遠塞霓旌濕
風度虛樓燕幙涼
竹裏踈花紅灼灼
窗前流水碧浪浪
山中禾黍多應好
抱膝長歌喜欲狂

別易水諸公

一家遠隔萬重山
古道人行稀
獨自還夜月
屢傾燕市酒
春風又度雁門關
晴雨散千峰
外野屋雲生半席間
兄弟何時重會面
燈前相對話時艱

憶王氏弟

大野荒寒起夕陰
錢蟬幽咽亂清砧
虛庭宿露蒼苔滑

遠道秋風黃葉淡烽火未收三月信田園空負百年心
多情好是西城月時向愁邊照苦吟

憶安常

鐘殘水國夜初分雪屋燈前夢見君阮籍途窮隨處哭
杜陵詩好幾回聞青山故國迷黃煙月白首閒情寄水
雲苦恨東風不相識吹人愁思轉紛紛

送燕倅

祖席衣冠盡士林秋風古驛馬駸駸考功不愧循良傳
遮道還憐父老心日轂影高三殿曉霓旌光動五雲深
歸時正及梅花放一路吹香雪滿襟

挽許璘

碧海珠沉失夜明青雲器業竟無成空歌周頌有高廩
不見宣尼畏後生紫塞雲低飄隴樹白楊風急捲銘旌
傷心忍過西城路易水東流送哭聲

題仙呂翁廟

策名文彩動蟾宮飛上丹梯笑葛洪劍影冷涵雲氣濕
笛聲清繞月輪空墨翻詩壁研磨外神現松精候謁中
幾擬細詢仙歲月芙蓉溪上又秋風

題金山寺贖陸先生韻

天連泗水水連天煙鎖孤村村^鎖煙寺逸薜蘿羅逸寺川
通巫峽峽通川酒迷醉客客迷酒船送行人人送船此
會應難難會此傳今勝古古今傳

往郎山

郎山宛在瓦橋西
煙樹蒼茫望欲迷
把酒花飛愁處滿
送行詩好別時題
泠泠古調南薰細
奕奕高名北斗齊
此去心旌好相照
素書幾日寄幽栖

春日雜興和前韻

隔溪茅屋曙光分
簌簌紅桃映此君
煙圃藥苗晴後種
風窗香靄靜中聞
秦人無復歌黃鳥
華岳猶堪臥白雲
怪殺楊花輕薄甚
滿衣吹作雪紛紛
水村幾曲路斜分
煙寺西邊訪隱君
白晝暄風吹酒醒
青林啼鳥隔溪聞
一竿好釣磯頭雨
雙杼誰耕洞口雲
碧柳紅桃滿春色
那堪歸思轉紛紛

送知縣

縣齋寂寂遠塵氛
草滿園扉翠欲熏
日轉棠陰侵席過
風迴琴響隔花聞
水分九派通滄海
地擁三關壓紫雲
河朔近來為令者
路人爭道不如君
長亭雲樹擁征鞍
意欲留君計轉難
竹騎豈惟迎郭伋
蒲鞭直欲繼劉寬
班聯晚陞承殊寵
績考春曹陟最官
此別信知應未遠
楊花香襯馬蹄還

東林圖

匡廬遺想定如何
文物風流也自多
月滿空山號虎豹
日穿林樾漲藤蘿
青蓮結社朝乘犢
白水漁竿晚浴鵝
多半蟠根是仙李
向陽枝葉更婆娑

燈夕

燈簇上元夕花明仙苑春星毬懸碧落雲幄護朱闥歲
律時當午斗杓昏建寅六龍御丹極萬象入洪鈞淑氣
東浮野群星北拱辰樓頭霞散綺墻角雪銷銀已馳金
吾禁應無丞相嗔鰲山攢火樹獸錦疊文茵玉漏傳疎
點香颺迤暗塵篆煙吹繡幙簷霧濕紗中紫陌鷄鳴緩
紅橋馬過頻珠圍貂帽側窄梅放粉容新詩就題千帙
筵開值萬緡酒光搖潑灑舞影起紛綸序齒先耆艾忘
形略王賓聯翩仙子佩窈窕女兒身疊唱凌天籟爭歸
步月輪閭閻喧小子蕭鼓沸蒼旻童稚扶翁媪優伶學
播紳青雲文雅士白髮太平民世喜銷鋒燹巫羞祀鬼
神歡呼占歲稔傾倒見天真留滯無羈旅歌斜有醉人
宴遊逢霽景款曲會良姻是物恩波洽諸方化雨均腐
儒猶放浪令尹獨清貧屢辱情過厚從知道欲伸得人
類言偃愛客即陳遵聞望騰中外公忠出等倫威儀嚴
可畏襟度濶無垠公署鈔琴譜黌堂禮席珍河頭虎爭
渡桑下雉相馴五袴歌方振三農業已勤官清文字簡
鄉飲德風淳我已成迂朽行將賦隱淪弟兄皆鬼物田
畝半荆榛周急煩賢友持家養老親奇才推葛亮曲學
陋平津松徑荒煙裡茅堂野水濱讀書逾懶慢撫事幾
悲辛碧蘚侵碁局紅蕖沒釣綸髮蓬苦捫蝨衣破嘆懸
鶉出處慚先哲閭閻類迓臣多情依木石無分畫麒麟

城市聊從俗山林擬卜鄰業惟歸竹素書莫上楓宸性
入禪家學歌隨樵客斤生涯甘寂寞宰物定陶甄高尚
尊嚴子賢良笑却詵天涯正愁絕回首遇雷陳

擬上太傅丞相

燕塞蟠空積雪晴煌煌虎旅控幽并太公制敵分奇正
方叔行兵屬老成霜壓貂裘寒氣重星涵龍劍夜光明
日華冷射魚鱗甲霞彩朝迎鳥羽旌宇內勲庸扶帝業
帳前金鼓震天聲三槐曉雨青浮砌萬柳春風綠滿營
獵火燒雲煙四合轅門傳令月三更屯田有策年方稔
刁斗無聲夜不驚仗甲中堅排隊出弩驅前馬著班行
家藏書史傳賢子國有旂常播令名炳烈精忠通紫極

涵濡德澤到蒼生兩封穹爵承殊渥百戰山河定太平
門下衣冠多俊拔胷中湖海愈澄泓腐儒漂泊身如寄
破屋荒蕪寒病轉嬰七袞慈親傷老朽一絲微命轉伶俜
田園蕪沒憂生養骨肉分離憶弟兄水滿釣灘聞桂楫
煙迷鄉樹隔柴荆相君下顧千金價士類同傾萬古情
生意從茲生蔀屋謏材何用請長纓

和睦公九日韻

絳車曉發萬人看春入燕臺雪半乾聖代人材徵梓杞
憲庭風采接鷓鸞蟾宮露冷三花濕象簡霜飛六月寒
北闕輝煌承帝綍東林蕭瑟閉詩壇繡衣勸講臨芹沼
蔀屋懷賢賦考槃定有奇勛登汗竹豈無宏策上金鑾

天邊紫氣涵龍劍江上青山近馬鞍玉筍班聯三殿外
瓊林光動五雲端煌煌嘉瑞鍾神秀晶晶滄溟得木難
朝著人爭傳姓字慈闈書喜報平安永懷黃閣千金重
自保臣心一寸丹走也向來成老朽短蓑煙雨夢漁竿
立春日試筆

霞塢光相炫冰池凍半開影隨瑤色起香遜綵旗來

壯士

走馬過營門金甲吐光燄笑我讀兵書何如去學劍

燈花詞

彩發虛明間性涵膏火裡彪外而翔中花豈知報喜

賣花

風送賣花聲花香撲珠酒買盡擔頭春半是青樓婦

山中見王旼

笛弄林間月蓑披隴上雲朱門半消歇人笑不如君

聞雁

流響迷湘浦餘哀隔隴雲角殘燈外聽鐘定枕邊聞

東坡洗硯池

毫分赤壁雨墨染蜀山雲旗照龍蛇影波涵星斗文

贈隱者

聽鐘尋野寺隔樹扣雲關雀臥琴窗樵歸棋局閑靜

菊蹊

荒徑雨苔未掃踈籬霜蕊先開綠酒從人放飲白衣為

我攜來

山行

村村寺寺竹好水水山山路遙林鳥催人喚酒野色隨
車過橋

題逸士圖

秋思枕邊踈雨年光葉上驚颿從渠得馬失馬笑我操
瓢棄瓢

春日即事

蝶弄花心初日鶯啼門口殘春半嶺半巖古寺一觴一
詠高人

題畫

虹彩明涵踈雨蟬聲暝咽殘陽人境不殊仙境醉鄉真
是吾鄉

初二晚涼登東樓

瑟瑟青楓水郭秋買鷄攜酒上東樓一瓢欲贈山中客
擲下清溪傲許由

經夢筆橋

風起湘波斷豕津長歌別恨寫悲辛揮毫幾擬題橋過
翻愧當時賣賦人

越王臺

越王臺前江水深越王臺畔草森森五湖明月青天上
照見鴟夷萬古心

陸生賦冠六朝文擲地金聲一座聞莫聽吳歌過江去
洲前花月夜紛紛

客中喜金震見訪

翻翻霜葉飛還墜寂寂風扉掩忽聞莫向尊前問僧臘
海門秋色逐潮來

贈彈箏人

秋雁斜飛啼恨深示將燕調雜吳音人人競聽拋紅錦
悔殺當時苦學琴

題垂虹亭壁

金樽綠酒蕩晴空花壓雙鬟舞袖紅莫唱何戡渭城曲
銀箏嗚咽怨秋風

送白楊長老二首

龍天擁護大江西江上分襟綠草齊一路藤蘿秋色裡
山山樹樹白猿啼

鶴隨金錫忽飛還踏遍吳雲越樹間一髮遠峰斜日外
認來多是九華山

立秋夜聽秋聲

漠漠微雲生晚陰滿林虛籟薄霜林有聲元在無聲裡
聽到無聲思轉深

春申君

歇也惛滛忍復論指胎畫策市君恩區區篡立成何事
翻與黃家闢禍門

隗臺

野老留人不肯任半醉扶筇入山去天風吹上黃金臺
放筆縱橫寫長句

山行

山壓金臺萬萬重尋幽盡日少人逢
況聞水北田廬好
白首躬耕學臥龍

沙岡曉發

白波滉蕩搖青天隔江打鼓是官船
天涯漸與故人遠
客懷寥落秋風前

對月同文楨宗兄賦

窗裡娟娟納月光船頭顧影轉淒涼
束書幾日還山去

露坐彈琴秋樹傍

送知縣

朝廷考績推循吏暮夜辭金謝故人
願借寇恂憐父老
蚤歸重看瓦橋春

挽蔣濟川夢妻

土蝕瑤釵摧白雁霜沉錦瑟斷朱絃
靈幃燈暗陰風起
忍見孤兒掛紙錢

一山集卷之二

一山文集卷之三

序

釣魚翁詩序

釣魚翁爵祿不入其心惟嗜魚故釣輒得魚寂寞之濱
投竿而漁有不知寒暄之改候飢凍之迫身欣戚之易
慮蓋嗜之篤故久而不能忘初非阨於生事而藉以餬
其口也至於得魚與不得魚亦未嘗計失得而渝所嗜
也大抵嗜而因物而觸於心雖古之人亦曷能無所嗜
哉故秋之嗜弈伯牙之嗜琴中散之嗜鍛伯倫之嗜酒
張旭之嗜書皆以之而生以之而死而能不少置焉者
豈直釣魚翁之嗜魚乎雖然翁之嗜吾固得而知之翁

之志吾不得而知之也昔者呂望釣渭而鷹揚之師寔
開有周之鴻業子陵釣桐江而一節之高式重大漢之
九鼎蓋其所嗜者小而所志者大也翁老矣其於魚也
嗜之而彌篤此其志予誠不得而知之顧嘗觀翁往來
釣魚處山空水寒魚鳥間暇超然有出塵之想得不使
人懷非熊之吉夢而慕江湖之高風者乎國家方求興
王之佐不召之臣翁乎其不獲終老於山澤也審矣彼
龍伯之誇任公子之誕直莊生之寓言耳不足為翁道
也翁曰吾知釣魚而已餘非所及也已而有野樵過之
翁酌以酒而歌之曰爾樵之適子我釣之逸子取樵以
湘子取魚以食子漁子樵子足以放吾之迹子歌竟翁

謂樵曰子去吾將釣吾魚釣魚翁謂李仲學而野樵則
翁之同姓延興也野樵記

禱雨詩序

劉侯為繁峙丞政務寬簡民物清宴郊野無犬吠之警
洪武辛亥夏不雨民嗷嗷無生意侯適以事詣大府未
遑恤也縣父老享於龍祠以禱之弗應徧禮群祠又弗
應自是奔走告祀不懈益虔五月二十有二日乃雨民
以為未洽也未幾侯竣事還盡然傷之乃潔齋致誠徒
跣露髻灑水于南山之龍湫侑以香幣奉以牲酒以薦
于群祠以享以祀以祝以祈以罄夫悃悞之忱時六月
七日也是日晝漏下二十刻青天無雲炎光燭地鄉燎

始上浮靄四垂霞飈迴旋電雷旬發感格之機既昭滂
洽之澤斯至越九日乃雨明日又雨又明日大雨民翕
然以樂躍然以抃而歡然如更生邑之士咸見之詠歌
而謁予序其端余惟記不云乎天降時雨山川出雲蓋
雨降自天信非吾人所能力致者然而有可致之道焉
何也吾盡吾誠焉耳惟誠可以開金石貫幽顯動天地
感神明雨澤之降毋惑也況侯為民請命而竭誠以籲
天精意昭垂洞達無間天其有不應乎昔者唐叔有善
政而禾同穎景公出善言而星退舍李廣利拔劍刺山
而飛泉涌出與夫劉昆熄江陵之火韓愈開衡岳之雲
感應之機古今一轍固非方士者流以竒術秘計簧鼓
乎顛蒙者比也予田野之細氓沐侯之惠深謹撫其實
而序之侯字仲儀江西人

送北平行大都督府掾宗德章序

北平古為邊壤唐虞三代曰幽都周秦戰國曰燕隋唐
曰幽州自名公始封至顯王滋大晉慕容垂唐安史五
代劉守光皆盜據其間金源氏始建國帝其疆入國朝
悉歸于職方風氣勁武河山雄麗五方走集蹄雷轂風
險阨繁富為西北邊最洪武初乃行大都督府以領之
壯形勢固關要也宗公德章以才諳入掾文事武備為
掾屬第一僕以筆札小技叨侍几席藉公培育如金在
鎔泥在鈞膏雨沛而槁木春也今年春有旨改府為燕

山都指揮使司公遂如京師行之日燕之士為文若詩以贈之者多僕雖匪藝可無言乎僕惟當茲宴熙之代豪傑接武於廷以公卓偉不群而獨後於眾賢也何居蓋天將老其才宏其器以大其用不欲其速化而銳進以安于庠近焉耳公自此升矣一日杖節擁麾來鎮此邦僕尚當乘單策羸與燕父老走迎道左也

茹孝子詩序

孝之為道古今一轍聖愚同天行之至則為堯舜為曾閔行有弗至必騁夫聖哲之軌而敬持之而力行之以至乎其未至斯可矣然堯舜之世比屋可封而曾閔之行人人所同也當是時孰為孝孰為不孝去古日益遠淳風日益醜彝倫日益衰其視孝為何為一有焉道之士卓然自奮於流俗則世必目之為仁人為君子甚至聞之朝以旌之書之史以褒之然指其名而稱之曰某也賢則其不賢者必多摘其實而贊之曰某也善則其不善者必眾其亦異乎堯舜之俗矣崞茹德遵事親孝歲戊戌兵亂傾家逃散父寢疾不能動德遵侍湯藥如平時斯須未常離而兵不忍戕已而父竟以壽終嗚呼孝者天理所寓人心所同雖事勢阽危之際庸詎無其人乎矧崞在昔為要郡在今為大縣土地如此其廣也戶版如此其多也讀書學道之士如此其不乏也是宜孝子慈孫之踵出矣而君子僅有取夫德遵焉嗚呼其

亦可尚也夫其亦可感也夫

送旦侯判官秩滿序

旦侯榮伯於鄂為官族蚤游輦下以才譖為大都督府從事及考登名吏銓調保定之祈州判官保為古冀州之域秦漢之名郡也其地跨趙魏冀代并而控瀛莫土壤肥夷習俗敦朴而民蹈信誼之行士子潔脩佩服儒素而城郭田里間弦誦之聲相聞也故侯以忠信道民而民益親以豈弟為政而政日脩以恪恭惠和交上下而人皆歆艷之恐後故是州之稱良有司者必以侯為第一昔人謂州縣之職徒人勞予始讀書林下未與人事接殊弗然其說暨河朔淆亂奔驚四方歷亭障過都邑官若民之事皆所目擊予是以知有司之不易為也今自一州言之其上為大府其下為僚佐又其下為屬縣館傳罷於應接簿書煩於勾稽錢穀困于考覈而吏胥之徒旁緣貧誥復禁起若蜂蝟然毆以荆扑而莫之懼防以法制而莫之禁事之委瑣使人焦思疲形奔走駭汗汲汲竟日不少休勞亦甚矣侯以卓偉之才如錐脫穎如金出鍊如牛刀之發矧用能剗紛劇解盤錯人皆以為勞而侯則易視之優為之非有卓偉之才能是乎哉自昔史氏之傳良吏者首書其幹潔予於侯亦云國家方當圖任舊人之秋侯之此行必能顯庸乎朝著而刺要郡尹大府不足多矣是為序

送學生於徵劉素赴成均詩序

歲行乙卯春予來道邑以口耳之學為桐子師其徒曰於生徵劉生素其質甚粹其行甚潔而其志甚大蓋蘄然出乎等夷而能讀書學道以藻飾厥躬者也明年秋兩生慨然欲游京師以進于太學此其志豈不夙異人哉行之日其父兄與其族戚及其鄉之人皆愛而惜之且為之辭以留之曰昔者顏子淵操瓢與箪飢餓陋巷卒明大道之要孟子之少也其母隣于墓徙于市又徙於學宮之旁遂由三遷之教以闡絕學西漢學士惟董子有儒者氣象觀其下帷讀書不窺園圃者三年而正誼明道之論千載偉之之三子之賢其始學也身固未常去鄉閭矣兩生也一旦棄丘壠違骨肉涉江湖而為萬里之遊行何獨與古人之志背馳若是哉予釋之曰抱材器者不務其細而務其大學聖賢者不于其跡而于其心千里之馬牽於繆微而難千里之行有所制也楛矢之利足以殪虎兕而不能責其貫蝨有所限也兩生之志蓋將肆其業閱其才博極其見聞而為他日壯行之地豈能齷齪林莽與艸木同腐敗耶矧太學為天下之賢闕而鴻儒碩士之所萃也兩生之往知所向矣子輿不云乎天下之善士斯友天下之善士今也欲求天下之士舍太學何以哉且聖賢之道載諸經存諸人而見諸事兩生之至也既得天下之書而誦習之又

得明師良友以切劘之又得京師文物之盛以激昂之
孰謂聖賢之德業不可幾其萬一乎雖然聖賢之學定
為之綱維兩生其朝夕持敬以詣乎六經之奧必能以
儒效表見于時而為斯道重也兩生其勉旃其行也邑
之大夫士及其朋友皆為詩以贈而縣簿葛侯屬予序
之予義不可辭迺書而揭諸卷首

送林縣丞序

辛亥夏五余自雁門返薊丘道過繁峙時榆社丞林侯
子茂奉府檄督賦而至余臥病旅次未遑造謁悵然如
失者累日洎余西來與侯邂逅于代邑一見如平生歡
時邑宰張侯景仁主簿段原善幕長馮敬臣皆賀余得

良友於是傾慕之私始_論情愛之真亦洽豈不驚喜過
望哉先民不云乎尚友千古蓋以哲人君子雖生不同
時而高懷雅趣有冥合焉者予之於侯非有一日之交
一面之雅也而傾蓋相契求之於今日可多得哉侯學
識超絕藻思飛動酒酣_論詠詩詞泉湧出與予同館以處
聯榻以臥慷慨劇談佳興無極不知夜之向曙矣旦則
理文牘辭朋友問道所由膏車南發余戀戀不忍其去
乃舉觴而言曰侯去矣山水懸隔相見知何時余東西
南北之人自中原始兵無田以耕無屋以居無甘旨以
養親周貧恤患非朋儕吾誰賴然奔馳千里知己者鮮
士之相與誠如鮑叔敬仲而相好如伯牙子期何待環

轍天下哉而世乏其人固將有望於侯矣侯立身正官
居廉待人恕治民愷悌而慈祥豈非余所願交者乎匪
朝伊夕必圖往而依之求侯為我結屋荒林窮谷之間
為宴休游歌所則一丘一壑自有樂處敢以望之賢侯
也

學仙集後序

予識廣信翁士白氏閱歲已一熟觀其淬礪古學則旨
趣之弥深與之高論雅道則啓沃之甚至一時朋儕如
吾士白不多見也一日出其先子梅窗先生詩一編曰
學仙集者徵予為序其詩驚人之句語層見疊出斂衽讀
之不欲去手以是知先生之學不可及也予生也晚恨
不得一拜屨前則興嘆曰古人謂不見異人當得異書
是詩也不謂之異書可乎不然何以名之曰學仙集也
夫學詩如學仙時至骨自換昔之為詩者有是言矣然
仙之始學則必澡體絕欲鍊形製魄寂如死灰縮如置
兔而後仙可學也詩之始學則必針腸剔胃蕩垢滌瑕
弘探四始備體百家而後詩可學也謂仙可易而學世
皆安期羨門矣謂詩可易而學也人皆蘇李陶謝矣由
此觀之仙固難致而詩亦豈易得哉讀學仙集者不可
以不知此也雖然山林韋布之士其文章之可貴而簡
帙之可傳者烏可縷數自非賢子孫有以紹述之安知
其不與草木同腐敗士白于其先子之遺藁愛護之恐

墜傳播之恐後而讀誦之恐忘此士白所以克世其家學

送永清稅課副使胡彥中秩滿序

周室興龍定九鼎於郊廓以名公與之有勞也昨土于燕而旌崇之今之永清即其封內地也當是時與雖未嘗就國而勳烈之大塞穹壤照冊書靡間乎四履矣姬轍既東入春秋列國洎乎秦漢魏晉隋唐之代才杰之士炳焉為北方之焜焜者武相踵而肩相摩千載之下想其英風景烈猶凜凜有生氣百稔以來河朔受兵禍亂慘烈城郭田野灌莽塞塗而才杰之裔死徙而莫遺矣予以洪武丙辰春典邑校于道明年秋得告歸里又

明年夏永清邑宰延平劉侯子初幕長完邑張彥高氏招致以攝其鄉學予樂從之以謂邑古稱多才杰儻至而拜其屨前則於聖若賢行已之大方與凡古今天下理亂興衰之跡或可以漸漬而得其什一今茲操弄朱墨行將一易天星而邑之人士惟朝夕過從而才杰之士聞乎莫間宜其嘉遯丘樊而弗獲一識其面哉雖然秦人謂隨武子曰子無謂秦無人夫秦特戰國靡耳尚猶不能無人矧茲宇縣隆平之其人乎此予於朋儕凋落之餘得吾彥中而友之

彥中

吳興人質粹而行脩予故樂與之游而弗

以夫人之可親而傷茲邑之未見也今茲於

誠

解在告而聽選於京也徵予為序以贈予惟彥

群固宜籥霄衢而直上顧乃栖遲下僚坐老歲月
吾固知宰物之於斯人蓋欲涉憂患履艱危老其才而
大其用耳予旅寄如此顧影無親彥中以官為家每於
公餘過我相與放情文酒而陶寫襟靈若大尹若長史
若固安侯博士敬方皆以學行稱於人人彥中悉與相
好而久要不忘彥中信才杰之士哉今之徃行見躋要
地沐龍光而文學政事與二三君子夙所論著者必能
裨贊帝猷矣於是與彥中慷慨而別已而人或讓之曰
子薄吾邑為無人奚為有二三君子在予謝之曰予恨
弗識其人而與之游予何人斯為而以是邑薄之若夫

二三君子者則所東西南北之人也夫豈一鄉一邑所
得而私之哉

送北平分教朱有常序

分教古無有也分教有學蓋欲文德之洽繇京師而暨
四方期於風俗之媿合外內而一之亦庶幾乎古矣在
虞夏之時有司徒典教於國都有庠塾敷教於天下固
未始有教分之說也然則分教之設其昉於唐嗣於宋
而盛行於今歟故韓愈氏由國子博士分教東都程伯
子嘗言諸朝俾有學德者為大學之師次以分教於天
下此其制焯焯著載於冊書者也清河朱有常氏氣清
而質粹德醇而行脩予足跡半天下所交海內之士多

矣至於英偉俊逸若金出鍊錐脫穎瞭鑑燭而割莫干
其孰愈于有常者乎故自始冠由國學弟子員分教北
平於是遵教條嚴訓誨而謹禮節其於聖若賢之萬墨
躬蹈力行弗弛以肆故省憲州府士林之才杰皆歆艷
而揄揚之甚至野夫賤隸一識其面皆願執策而不可
得予嘗於風雪之夕過其館下有常不覺傾倒亟命童
子取酒為歡放飲劇談玉漏下二十刻始各就枕旦欲
為別復牽挽不聽其去其於交友之誼惓惓若是人或
謂其氣岸峻卓之鮮與儔予竊以為不然予方欲卜鄰
以居異以啓迪顓蒙而有常赴召輦下矣行之日燕之
士咸為詩以贈而徵予序之予惟孟子與謂人之患在
好為人師柳宗元謂魏晉以下益不事師蓋以師道非
細故人心不易服自非德藝超絕而欲冒昧泆忍尸處
函丈不亦有泚其顙乎有常之來也出自帝心之簡拔
非如布韋士操鉛槧弄朱墨求食升斗者可以比而同
之矧能殫厥心思以罄厥職是蓋胄子之出色者今其
行矣行見竒才偉畧有以裨益乎國是鉅筆鴻文有以
鋪張乎帝勛而夜半前席天顏孔昭得無嘆賈生之久
不見乎有常勉之由是敷五教於首善之地增斯道為
九鼎之重吾非吾有常之望而誰哉

送安肅縣王簿王文昭序

安肅簿夷門王文昭氏以治最稱於人人今茲秩滿而

上計也天官也邑之民謀所以留之既不可得則皆俵
俵如失父母謂吾賢倅政在吾邑德在吾民聲譽在吾
士人之稱頌吾民之愛人之者無有已時其忍舍吾民
而遽往哉蓋至是可以觀民之心矣使其政未有孚澤
或不能下流民固嘆其去之不弗亟甚至一失其情且
將叫譟於涂操瓦石以徂擊之者有之矣其何以能若
是哉予往年典邑校於涑涑去安肅百里而近嘗過而
宿其傳舍文昭訪予夜窗風雪中促席以談至二鼓始
上馬去其言皆練於治體鑿鑿可聽其後士皆稱說不
去離口謂與古循良同一矩度也矧安肅自兵後民之凋
瘵者半非其善於輯綏民固無以更生大抵民版既登

其貨產也丁口也科徭也而豐而嗇而多寡而繁簡有
萬不侔苟不勘覈而責成於里胥彼或得以上下其計
乃立推派法析民物力而甲乙之邑當南北經涂師旅
往來蹄雷轂風官每疲於應接民常病於轉輸而車牛
丁夫更迭以伺不敢後於是悉令散歸至遞送始徵其
旁近戶以應之先是使客所費悉鳩於民而官若吏竊
取以供飲饌費者又什之五皆罷弊每邑凡千八百戶
而計口食鹽令甲也當其赴鹺場以走也工價由鄉社
出往往為細民病乃勸諭役占戶以輸之然鹽雖設局
變賣非有規畫則富者多取而貧者莫償其直甚至隣
壤亦得以私買於是勘戶口定分數俾上戶無冒取下

戶不憂其不給而盜亦不復越境屬者有旨建燕王邸第北平隸府八所調夫十餘萬輓木於朔代之間山谷阻躑暑雨暴蒸人多逃死而繩督日嚴有司奔走駭汗能勝其任者鮮文昭所部踰萬人不防衛不答扑而底於成績撫馭之有方也至於攝完六閱月攝慶都又八閱月所施有善政所至有能聲章章可書也矧其襟度澄朗而沉鷲有識廉礪之操皦然不緇居一室門巷荒寒僅蔽風雨暇則展玩書史疊疊不休故其於世好漠如也今之徃行見膺上考陟崇階而尹大郡其益慎厥位用沐寵光予以肩茂恭踵遂霸是昉於此人或難之曰兩漢以還吏稱循良者無幾子於文昭以是與之非

溢美乎曰非也

送武先生歸里序

春秋傳曰太上有立德其次有立功其次有立言三復是說未始不為之永慨也嗚呼士懷抱利器誠遇其時輒能乘事會取功名附驥尾而致身青雲一失其時借曰道德萃厥躬制作合盤詰往往淪跡布韋而委身山澤而奕奕不信之氣徒足以薄星辰賁泉石礪鬱乎終古其何以能傳其不傳之傳哉武先生周文蚤師汝南尚元素不三數年盡得其師之說其于聖賢之經之傳釋老之說兵家之書卜筮之術縷分刃解綜其肯綮已而鄉之子弟執經以師之者屢相踵于門先生誨人弗

倦各因其性之所近而迪之其篤實詳博之學河朔間所未見也先生嘗與客論史援據精覈不脫一辭客大驚服以謂必其專於誦習而得之不知先生固未始誦而習之也蓋其天稟杰出於書數百言三四讀輒能成誦至於子史百家不過與其門弟子點校之餘而得之爾先生於吾家為姻戚先生公承旨不恙時籃輿每至延興以童子侍側聽其論古今道政事與凡理亂興衰之跡娓娓不斷由是知先生為不可及矣已而先公厭世中原倣擾書問不通者凡十春乙卯之歲延興以謫學典邑校於涑時先生講道保之郡庠過而拜其屨前恍如隔世雖其年踰六袞而神腴色澤不減昔年豈河岳英靈之氣有以介眉壽榮晚節而著德美於厥躬歟用是知嚮之可傳者茲不恨其不傳矣屬者得告歸里大夫士名能為文辭者皆有以贈之乃執筆叙其予兩家之好與其行實之詳義當然也延興役滿且有日春與秋必將裹飯擔笈以問往時釣游處一丘一壑其尚許以卜鄰否乎

送胡希一游秦序

歲行己丑余識胡君希一於輦下見其儀觀之美詞章之富遂與定交焉君則不外余之庸且陋也恒以德藝相勉一行之過一言之玷規戒立至如是者垂十餘稔後余竊取一第私用慚甚謂是雖出自倖致而前日講

學則不可忘記可悉謂講學無絲髮助一切由倖而致
哉未幾從事掾屬求食升斗簿書期會無已時不獨思
前數年肄業之功不可復得至欲數相往來究論文事
亦不遑及矣今年春以嚴君佐閩河北甫得告聞方圖
與我同好讀書為文交相砥礪如往歲時而君將挈家
西矣暨別求余贈言余惟世之士顓務於外而病存於
內者多存於內者無赫赫之聲不足取重於人務於外
者往往自鳴其美立取大官厚祿故其高自譽導百不
顧藉在里巷則炫燿乎一才一藝游公卿間則雄辨長
說是非古今不能休揣摩相師陶濡成風如水之決而
不可闕焉由聖賢之學觀之不有仁義道德之說在乎
故用之於身用之於家於國於天下其揆一也彼為口
舌學以階梯富貴者戰國游說之習耳今七十二子之
書且在自昔通經之士羞稱之矣君讀書為儒聖若賢
之道講之熟矣而行之力且其穎敏俊發之才不易多
得譬之美玉待價不求人知人自知之人將不能舍也
夫子之告顓孫師曰言忠信行篤敬雖蠻貊之邦行矣
予與公學孔子者也請相與佩服斯言使不惑於戰國
之習而成德達財如鄒魯士豈非善乎予又聞參政李
公慷慨負氣有古良將風今總川蜀之兵於隴右思得
才士與之籌畫有日矣君之行其有遇哉昔者司馬子
長游

會稽歷梁宋齊魯之地以壯其文氣班定

遠不事筆硯 建侯萬里外君以聖賢之學抱應變之才而行之以忠信篤敬其寧有不遇乎參政幕下有曰達君成章者予同年也予與之友善者也其至也幸以予說告之也

節婦金夫人詩序

國風凡十有五而婦人女子之事居十之七二南尚矣其下十有三國賢婦人之詩邐止於八篇鄘止於一篇衛齊鄭合之凡三篇而止何其不能皆賢也歟囿於風氣之浮靡枯於聲教之衰遲夷而桑濮之謠鴉鵲之歌鄭衛之音更唱迭和蓋自幽厲之衰則然及乎王轍之東尤蕩然矣然降衷秉彝聖愚同天而古今一軌斯理也譬諸天地之覆載日月之代明河嶽之流峙陰陽鬼神之變化終古不可死者矣今節婦義興橘洲參政孫姚侯文臨夫人也歲壬辰淮淝亂義興燬于兵侯將挈家走而道棘不可前且其父耄矣夫人抱幼女哭江水上與侯訣曰我當死汝策汝父去否則俱餌虎口無義也遂抱女赴水死當是時雄藩鉅鎮本戎材者銜天憲犬牙參錯也貴族之家析圭儋爵者雲仍相踵也東南文物之邦章甫逢掖之士談道德而負聲名者炳耀乎後先也而訖無一士之死國難聞節婦之風不亦有泚其頽歟已而薦紳先生為賦詩侯尹保定之明年是為己未之歲也是歲杪秋延興過而謁侯徵序以冠其帙

端予惟二南正始也當殷之季周之興也文王之后妃諸侯之夫人大夫士庶人之妻一於正而不失其正其所始者正也今夫人之死正矣夫孰知橘州一門正身及家而昭示累葉者世澤未斬也古者天子命太師陳詩以觀民風後世因之古今人詩雖其體裁與時高下而正聲要眇起于渾淪之天今猶古也是帙也詩凡若干首而辭微旨幽庶其振遺予響古風寥落中予以貢之明廷頒之樂官被之管絃用之鄉黨邦國及其至也江沱汝漢之域家藏而人誦之亦足以鼓吹二南羽翼五品而風厲九域矣侯文學政事傑出一時予凡三往返而風誼弥篤兼之以斯文骨肉我也乃序其槩於末簡

而歸之

送雄縣宰程侯後序

歲乙卯予典邑校於涑涑與雄於保下為屬縣其相距百里而近時括蒼程侯之知縣於雄也政績之美偉予已飲聞之第恨弗獲數相往來論古今道政事而詢夫要政之萬一明年予以校事詣保下與深澤尹董侯方舒束鹿尹李侯子儀安肅簿王侯文昭語及有司之良則皆曰程侯九鼎其人乎又明年以預脩郡志如薊門與文學掾蓋君九成葛君道一語及明儕之賢則皆曰程侯九鼎其人乎之數公皆以學行稱于人人予固信其說矣又明年侯以秩滿上計天官也燕之士為文若

詩以贊之者短章大篇娓娓不絕予奚容置喙其間哉
予觀兩漢史氏之傳循良也于其惠政皆詳著於編侯
之為政有以儷美之蓋無媿于古矣故其闢田野增戶
版均賦徭導水利建壇廟興學校理郵傳既詳既周悉
中矩度人皆難之侯則易視之而優為之才固弗可尚
已雖然四代之時岳牧侯伯咸稱其職非若後世之曠
官廢事也去古日滋遠王治不可復於是慎選守令之
制盛于兩漢後之有民社者皆因之一行之善必錄也
一事之美必褒也一言之有裨于世必歆艷而不置也
至是可以觀世變矣國家一四海而家之循良之吏接
武于時治道復古茲焉可龜若吾程侯者豈非傑出等
夷而炳耀乎君子之林者歟今其行矣行見蕭足霄衢
以近天子之寵光而刺要郡尹大府不足多矣侯時趣
裝南轅予與邂逅薊門夜窗燈火旅况寂寥乃拭楮操
觚序其惠政于風雪中歲晏天寒山川阻濶尚願寄聲
寥廓慰予萬里之思交友之誼也

送易州奇峰口朱巡檢秩滿序

易於古為邊壤周之盛也與以功而昨土其衰也藉以
強而建侯至其末也昭王以孱弱之餘崛起紛壤而能
蒐羅賢俊弼成霸業其功烈至今照映簡冊其他若公
孫瓚輩盜據其間者不論也况其河山鉅麗風氣勁武
而民物富繁蓋雲霄之藩障幽并之襟喉而瀛保之局

鑄也予壯齒常一游於是道范陽歷督亢略道城而繞
出易水上覽周秦之遺跡慨帝伯之餘威唾群兇之殘
焰而傷夫興衰理亂之不一也竒峰在今郡治西定萬
山環合狀若重墉予樂其土風之厚也嘗買田以耕慕
夫丘樊嘉遯之士之可與游也嘗贏糧而往從之矣兵
後奔驚東西弗遑至焉者踰十春及吾友朱君彥明之
為巡檢也規一往而不可得戊午之秋予自鷄泉返薊
丘折北而過竒峰訪君於空山落木之間風雨譙樓觴
詠終夕不知五鼓之作矣時彥明帙滿治瘵將之南大
夫士皆為詩以贈而徵予為之序予惟易邊郡也竒峰
窮壤也巡檢卑官也自恒人處此其無聊不平之氣將

喋喋口吻若不能一朝居者皆是也彥明以疏通之才
卓偉之識蓄而不發練而益通老而逾厲蓋將磨礪世
故而大行於他日夫豈馳逐聲勢之徒志滿意得僥倖
自快於一時者可以方其萬分之一哉矧彥明嚮仕萊
邑今復歷職於是是職也蓋兩試之矣今天下大一統
非如周秦戰國之分裂也彥明勉之韜鈴之書封守之
略警邏之方山川險夷之勢尚有以竟其奧而領其槩
是行也其必首膺殊擢矣一日懸方寸之璽垂丈二之
組提數萬之衆操生殺刑賞之柄握兵閫外坐鎮一方
使天子嘉之曰真將軍豈終乘一障而汨沒於有為之
時也

鄭氏義讓序

浙江義讓鄭氏其先滎陽人系出漢大司農當時唐從
讜以下三世為相五季散居閩粵聞宋工部侍郎登龍
徙于溫遂家焉龍圖文肅公景望丞相忠定公清之以
勳德為世所推服讓德之著則自德潤昆季始德潤字
東里工部五世孫文肅忠定之諸孫也其才器傑出一
時與其兄士榮士堅耕讀為業而孝友天至至於辭田
廬辭帑藏辭爵祿皆焯焯表見于鄉閭先是元兵下江
南丞相陳宜中翊廣王益王至溫募忠義士士堅兄弟
以舟師從丞相欲官之辭曰以義許國要取爵位耶俱
不受德潤念其親老非二兄莫能經紀其家請代兄從
戎士堅以德潤幼不聞兵事又為母所鍾愛戒其往往
則貽親憂德潤固請遂由海道入廣既而元兵大索送
二王乃械士堅赴臨安丞相伯顏總戎時也未幾宜中
兵潰德潤聞兄被執走臨安訴兄勤王事請代死丞相
兩釋之先是族兄德堅以歸附得總管漳州路病卒丞
相以士堅襲其職辭不就乃授德潤兩浙茶鹽提舉轉
行泉府司丞已而稱疾不出子俊謹厚而文當襲官德
潤曰吾兄士榮之行鄉里賢之而白首山林迄無一命
之及請以其子景福襲廷議從之授海道千戶佩黃金
符後征瓜哇以勞累階征南右軍上千戶以海道副萬
戶致仕恒曰我之仕由叔父致敢恃德乎請以弟俊襲

俊曰父職子襲令典也願歸兄子哇哇曰父命也吾何
敢違相讓至再四俱不仕省憲以聞久之有旨旌其門
及命有司立祠墓左至正間事也貢士胡世佐秘書著
作即李孝光翰林脩撰楊三傑有家傳尚書貢師泰有
祠堂記承旨張翥題其扁學士張以寧有詩數經亂離
燬於鋒燹可慨也俊字省心子三人瑞珍復瑞母陳早
喪繼母黃氏鞠育教訓踰于己子而瑞孝養弥謹人罕
與儔復讀書有氣義里人有吳姓者利鄭氏財誣瑞不
法訴之官復憂其不能直詣有司曰罪在我兄瑞不知
也因得辨於部使者部使者知復為瑞異母之弟瑞且
察其情無他吳遂伏其辜復游京師受知太師丞相脫
脫辟府掾上書言事不合求外補適溫之屬邑盜作受
本路治中江浙丞相達識帖穆兒以便宜調平江水軍
萬戶以討之尋升僉浙東都元帥府事轉戰不利陷於
賊困辱百至竟不屈久之乘間走還乃命諸都兵招捕
之殲渠魁釋誣全活數千人衆為建祠于永嘉昭其
德也後以江浙行樞密院經歷調同知黃州宣慰惠州
路總管以疾辭歸隱于盤門山朝廷推恩贈德潤潮州
路總管追封滎陽郡侯俊簽書江西行樞密院事追封
滎陽侯瑞之子曦仕至江西行樞密院事都事佐簽院
袁仁守興化軍洪武初大軍入閩叛將殺曦弃城遁民
痛悼之於是柄兵者禮葬郭門外今溫之人猶能語其

事予常觀謂從古稱勛伐之家非直世祿之顯榮也詩書之懿仁義之實涵濡之久培植之至則元氣迴薄而生意舒暢譬諸木焉固其本而末自茂譬諸水焉濬其源而流必達固非朝夕使然也今觀鄭氏讓德之光累世而不乏絕豈惟世德之積若是天之所以報施善人也故太史遷自叙歷舉先世之蹟非以矜眩夫人人欲其由身而子而孫而雲仍知夫積累之非易則知所以承藉而弗替古之道也操之以敬慎而範之軌度守之以敦篤之行而延之以忠厚之澤雖後乎百世世澤滋遠也予故撫其本末而次第之庶他日太史氏有所採擇云

蔣氏族譜序

大小宗法之廢久矣近士大夫家乃能仿古為世系故其藏之家者有譜牒紀之官者有簿狀而傳之子孫者有徵驗雖其閱世滋久而本支藉以弗墜非細務也前代之衰天下失太平幾二十年而衣冠文獻之裔流播死傷於鋒燹者多宜其譜牒而世系隨之矣東安邑丞丹陽蔣公出其族譜以集列宗屬之原辨姓氏之始毫分縷析可以一覽而得之按蔣氏得姓於周至漢兗州刺史詡及函亭侯休皆以勲業著當代而魏隋唐宋以來為公輔為州佐為縣令為進士為名儒者相踵也數值亂離譜多散軼其所存者僅十一之二三亦不知

其出於蔣氏何代子孫也公生也晚惻然傷之方圖採
撫傳記以葺其未備而究其未詳雖其未可朝夕遽就
其亦可謂述祖烈矣唐貞觀中詔溫彥博等撰氏族志
首皇族次外戚而黃門侍郎而崔氏幹為第三凡二百
九十三姓千六百九十一家及其五季之亂舊本率皆
殘缺是雖有譜猶無譜也自其無譜者言之世之愚不
肖之徒之於先世茫無所知而昧無所述往往妄引貴
族名賢以為之宗生悖其親而死誣其祖悲夫愚不肖
於是譜知蔣氏世有令德且重吾貳令之克世其家公
字守約穎敏天出而孜孜於學故其施之政事沛然有
餘而無作步豈聞祖風而然耶春秋傳曰公侯之子孫

必復其始吾非吾貳令之望而誰哉

送徵君嗣宗赴遂城鄉學序

予生長薊門足跡未嘗及瀛莫兵後遊易定間始聞安
肅劉侯君嗣宗以儒世其家鄉之士稱為善人為長者
為君子予得之吾友王君文昭云往來安肅者再四弗
遑一拜其屨前洪武九年秋予以預脩郡志詣保下始
甫與相識前後相從幾兩旬而笑談樽俎不翅若平生
歡明年予過雙乳邂逅於逆旅邸風雨連朝羈思牢寂
嗣宗以百金為予取酒遽飲至二鼓始各就枕又明年
予自恒山歸東安復與之傾蓋于途已而會飲友人霍
尚賓館絕倒之餘不覺終晷至是與嗣宗為相知矣時

嗣宗治衰如遂城典鄉校也行之日徵予為文以贈予
曰予以謏學玷文名於吾於儒事未竟其一二烏乎而
能文雖然予惟不文故言不浮而足以傳信於人此叙
之作所以不敢讓也矧嗣宗潛心正學以殖其德而白
首窮經將以踐孔顏之堂而紹先世之弓冶固非一鄉
一邑之士可以比而同之也夫達焉弗矜窮焉弗憂人
知否一皆漠然於心惟欲唱鳴斯道以淑諸人以盡吾
儒分內事以扶植名教而流耀無窮非細故也或曰為
非士也曾不知仲尼以四五十無聞為不足畏常舉
以警門弟子河朔秋高予將別嗣宗為司馬馬太史萬里
游以壯吾胸中之文氣非為名也於是嗣宗與予相視

一笑遂別



